



北史
三



リ 8
1735
193



1735
193

北史卷九

周本紀上第九



所部月卅
購山諸八
以讓田同年
贈資一人八



武川屯
氏備回南

周太祖文皇帝姓宇文氏諱泰字黑獺代郡武川人也其先出自
炎帝炎帝為黃帝所滅子孫遁居朔野其後有葛烏兔者雄武多
算略鮮卑奉以為主遂總十二部落世為大人及其裔孫曰普回
因狩得玉璽三紐文曰皇帝璽普回以為天授已獨異之其俗謂
天子曰宇文故國號宇文並以爲氏普回子莫那自陰山南徙始
居遼西是曰獻侯為魏舅甥之國自莫那九世至侯疇豆為慕容
晃所滅其子陵仕燕拜駙馬都尉封玄菟公及慕容寶敗疇魏拜
相牧主賜爵安定侯天興初魏遷豪傑於代都陵隨例徙居武川
即為其郡縣人焉陵生系系生韜韜生皇考肱並以武略稱肱任
仗有氣幹正光末沃野鎮人破六韓拔陵作亂其偽署王衛可環

及古周
長

最盛肱乃糺合鄉里斬壞其衆乃散後陷鮮于修禮爲定州軍所破戰沒於陣武成初追謚曰德皇帝帝德皇帝之少子也母曰王氏初孕五月夜夢抱子升天纔不至而止寤以告德皇帝德皇帝喜曰雖不至天貴亦極矣帝生而有黑氣如蓋下覆其身及長身長八尺方額廣額美鬚髯髮長委地垂手過膝背有黑子宛轉如盤龍之形面色紫光人望而敬畏之少有大度不事家人生業輕財好施以交結賢士大夫爲務隨德皇帝在鮮于修禮軍及葛榮殺修禮帝時年十八榮下任將帥察其無成謀與諸兄去之計未行會榮滅因隨爾朱榮遷晉陽榮忌帝兄弟雄傑遂託以他罪誅帝第三兄洛生帝以家寃自理辭旨慷慨榮感而免之益加敬待始以統軍從榮征討後以別將從賀拔岳討北海王顥於洛陽孝莊反正以功封寧都子後從岳入關平万俟醜奴行原州事時關

隴寇亂帝撫以恩信百姓皆喜曰早遇宇文使君吾等豈從逆亂帝嘗從數騎於野忽聞簫鼓之音以問從者皆莫之聞意獨異之普泰二年爾朱天光東拒齊神武留弟顯壽鎮長安召秦州刺史侯莫陳悅東下岳知天光必敗欲留悅共圖顯壽計無所出帝謂岳曰今天光尚近悅未必貳心若以此事告之恐其驚懼然悅雖爲主將不能制物若先說其衆必人有留心進失爾朱之期退恐人情變動若乘此說悅事無不遂岳大喜卽令帝入悅軍說之悅遂與岳襲長安帝輕騎爲前鋒追至華陰禽顯壽及岳爲關西大行臺以帝爲左丞領岳府司馬事無巨細皆委決焉齊神武旣除爾朱氏遂專朝政帝請往觀之至并州神武以帝非常人曰此小兒眼目異將留之帝詭陳忠款具託左右苦求復命倍道而行行一日而神武乃悔發上驛千里追帝至關不及而反帝還謂岳曰

高歡豈人臣邪逆謀未發者憚公兄弟耳侯莫陳悅本實庸材亦不爲歡忌但爲之備圖之不難今費也頭控弦之騎不下一萬夏州刺史解拔彌俄突勝兵三千餘人及靈州刺史曹泥並侍僻遠常懷異望河西流人紇豆陵伊利等戶口富實未奉朝風今若移軍近隴扼其要害示之以威懷之以德即可收其士馬以資吾軍西輯氏羌北撫沙塞還軍長安匡輔魏室此桓文之舉也岳大悅復遣帝詣闕請事密陳其狀魏帝納之加帝武衛將軍還今報岳岳遂引軍西次平涼岳以夏州隣接寇賊欲求良刺史以鎮之衆皆舉帝岳曰宇文左丞吾左右手何可廢也沉吟累日乃從衆議表帝爲夏州刺史帝至州伊利望風款附而曹泥猶通使於齊神武魏永熙三年正月賀拔岳欲討曹泥遣都督趙貴至夏州與帝謀帝曰曹泥孤城阻遠未足爲憂據莫陳悅貪而無信是宜先圖

也岳不聽遂與悅俱討泥二月至河曲果爲悅所害衆散還平涼唯大都督趙貴率部曲收岳屍還營三軍未知所屬諸將以都督寇洛年最長推總兵事洛素無雄略威令不行乃請避位於是趙貴言於衆稱帝英姿雄略若告喪必來赴難因而奉之大事濟矣諸將皆稱善乃令赫連達馳至夏州告帝士吏咸泣請留以觀其變帝曰難得而易失者時也不俟終日者機也今不早赴將恐衆心自離都督彌姐元進規應悅密圖帝事發斬之帝乃率帳下輕騎馳赴平涼時齊神武遣長史侯景招引岳衆帝至安定遇之於傳舍吐哺上馬謂曰賀拔公雖死宇文泰尚存卿何爲也景失色曰我猶箭耳隨人所射者也景於此還帝至平涼哭岳甚慟將士悲且喜曰宇文公至無所憂矣齊神武又使景與常侍張華原義寧太守王基勞帝不受命與基有舊將留之并欲留景並不屈

乃遣之時斛斯椿在帝所曰景人傑也何故放之帝亦悔驛追之不及基亦逃歸言帝雄傑請及其未定滅之神武曰卿不見賀拔侯莫陳乎吾當以計拱手取之及沙苑之敗神武乃始追悔于時魏帝將圖神武聞岳被害遣武衛將軍元毗宣旨勞岳軍追還洛陽毗到平涼會諸將已推帝侯莫陳悅亦被敕追還悅既附神武不肯應召帝曰悅枉害忠良復不應詔命此國之大賊乃令諸軍戒嚴將討悅及毗還帝表於魏帝辭以高歡至河東侯莫陳悅在承洛首尾受敵乞少停緩帝志在討悅而未測朝旨且衆未集假爲此辭因與元毗及諸將刑牲盟誓同獎王室初賀拔岳營河曲軍吏獨行忽見一翁謂曰賀拔雖據此衆終無所成當有一字文家從東北來後必大盛言訖不見至是方驗魏帝因詔帝爲大都督卽統賀拔岳軍帝乃與悅書責以殺賀拔岳罪又諭令歸朝悅

乃詐爲詔書與秦州刺史万俟普撥令爲已援普撥疑之封以呈帝帝表奏之魏帝因問帝安秦隴計帝請召悅授以內官及處以瓜涼一藩不然則終致猜虞三月帝進軍至原州衆軍悉集諭以討悅意士卒莫不懷憤四月引兵上隴留兄子遵爲都督鎮原州帝軍令嚴肅秋毫無犯百姓大悅軍出木狹關大雪平地二尺帝知悅怯而多猜乃倍道兼行出其不意悅果疑其左右有異志左右不自安衆遂離貳聞大軍且至退保略陽留一萬餘人據守承洛帝至圍之城降帝卽輕騎數百趣略陽以臨悅軍其部將皆勸悅退保上邽時南秦州刺史李弼亦在悅軍間遣使請爲內應其夜悅出軍軍自驚潰將卒或來降帝縱兵奮擊大破之悅與其子弟及麾下數十騎遁走帝乃命原州都督遵追悅至牽屯山斬之傳首洛陽帝至上邽悅府庫財物山積皆以賞士卒毫釐無所取

左右竊以一銀甕歸帝知而罪之卽剖賜將士衆大悅齊神武聞
關隴尅捷遣使於帝深相倚結帝拒而不納封神武書以聞時神
武已有異志故魏帝深杖於帝仍令帝稍引軍而東帝乃令大都
督梁禦率步騎五千將鎮河渭合口爲圖河東計魏帝進帝侍中
驃騎大將軍開府儀同三司關西大都督略陽縣公承制封拜使
持節如故時魏帝方圖齊神武又遣徵兵帝乃令前秦州刺史駱
超爲大都督率輕騎一千赴洛魏帝進授帝兼尚書左僕射關西
大行臺餘官如故帝乃傳檄方鎮曰蓋聞陰陽遞用盛衰相襲苟
當百六無聞三五皇家創歷陶鑄蒼生保安四海仁育萬物運距
孝昌屯沴屢起隴冀騷動燕河狼顧雖靈命重啟蕩定有期而乘
爨之徒因翼生羽賊臣高歡器識庸下出自輿阜罕聞禮義直以
一介鷹犬效力戎行醜冒恩私遂階榮寵不能竭誠盡節專挾姦

回乃勸爾朱榮行茲篡逆及榮以專政伏誅世隆以凶黨外叛歡
若相敦勉今取京師又勸吐万兒復爲弑虐暫立建明以令天下
假推普泰欲竊威權並歸廢斥俱見酷害於是稱兵河北假討爾
朱亟通表奏云取讒賊旣行廢黜遂將篡弑以人望未改恐鼎鑊
交及乃求宗室權允人心天方與魏必將有王翊戴聖明誠非歡
力而歡阻兵安忍自以爲功廣布腹心跨州連郡端揆禁闔莫非
親黨皆行貪虐竄生靈而舊將名臣正人直士橫生瘡痍動挂
網羅故武衛將軍伊琳清直武毅禁旅攸屬直閣將軍鮮于康仁
忠亮驍傑爪牙斯在歡收而戮之曾無聞奏司空高乾是其黨與
每相影響謀危社稷但姦志未從恐先泄漏乃密白朝廷使殺高
乾方哭對其弟稱天子橫戮孫騰任祥歡之心齋並使入居樞近
伺國間隙知歡逆謀將發相繼歸逃歡益加撫待亦無陳白然歡

入洛之始本有姦謀令親人蔡儁作牧河濟厚相思贍爲東道主人故關西大都督清水公賀拔岳勲德隆重興亡攸寄歡好亂樂禍深相忌毒乃與侯莫陳悅陰圖陷害幕府以受律專征便卽討戮歡知逆狀已露稍懷旅拒遂遣蔡儁拒代令竇泰佐之又遣侯景等云向白馬輔世珍等徑趣石濟高隆之及婁昭等屯據壺關韓軌之徒擁衆蒲坂於是上書天子數論得失訾毀乘輿威侮朝廷藉此微庸與茲大寶溪壑可盈禍心不測或言徑赴荆楚開疆於外或言分詣伊洛取彼讒人或言欲來入關與幕府決戰今聖明御運天下清夷百寮師師四隩來暨人盡忠良誰爲君側而歡威福自己生是亂階緝構南箕指鹿爲馬包藏凶逆伺我神器是而可忍孰不可容幕府折衝宇宙親當受朕銳師百萬鼓騎千羣裹糧坐甲唯敵是俟義之所在糜軀匪愆頗有詔書班告天下稱

歡逆亂徵兵致伐今便分命將帥應機進討或趣其要害或襲其窟穴電繞地擊霧合星羅而歡違負天地毒被人鬼乘此掃蕩易同俯拾歡若度河稍逼宮廟則分命諸將直取并州幕府躬自東轅電赴伊洛若固其巢穴未敢發動亦命羣帥百道俱前轅裂賊臣以謝天下其州鎮郡縣率土黎人或州鄉寇冕或勲庸世濟並宜捨逆歸順立效軍門封賞之科已有別格凡百君子可不勉哉帝謂諸軍曰高歡雖智不足而詐有餘今聲言欲西其意在入洛吾欲令寇洛率馬步萬餘自涇州東引王羆率甲士一萬先據華州歡若西來王羆足得抗拒如其入洛寇洛卽襲汾晉吾便速駕直赴京邑使其進有內顧之憂退有被躡之勢一舉大定此爲上策衆咸稱善七月帝帥衆發自高平前軍至于弘農而齊神武稍逼京師魏帝親總六軍屯河橋令左衛元斌之領軍斛斯椿鎮武

牢帝謂左右曰高歡數日行八九百里曉兵者所忌正須乘便
之而主上以萬乘之重不能度河決戰方緣津據守且長河萬里
扞禦為難一處得度大事去矣卽以大都督趙貴為別道行臺自
蒲坂濟趣并州遣大都督李賢將精騎一千赴洛陽會斌之與斛
斯椿爭權鎮防不守魏帝遂輕騎入關帝備儀衛奉迎謁見於東
驛免冠流涕謝罪乃奉魏帝都長安披草萊立朝廷軍國之政咸
取決於帝仍加授大將軍雍州刺史兼尚書令進封略陽郡公別
置二尚書隨機處分解尚書僕射餘如故初魏帝在洛陽許以馮
翊長公主配帝未及結納而魏帝西遷至是詔帝尚之拜駙馬都
尉八月齊神武襲陷潼關侵華陰帝率諸軍屯霸上以待之神武
留其將薛瑾守關而退帝乃進軍斬瑾虜其卒七千還長安進位
丞相十一月遣儀同李諱與李弼趙貴等討曹泥於靈州諱引

灌之明年泥降遷其豪帥于咸陽十二月魏孝武帝崩帝與羣公
定冊尊立魏南陽王寶炬為嗣是為文帝

大統元年正月己酉魏帝進帝都督中外諸軍錄尚書事大行臺
改封安定郡王帝固讓王及錄尚書魏帝許之乃改封安定郡公
東魏將司馬子如寇潼關帝軍霸上子如乃回軍自蒲津寇華州
刺史王羆擊走之三月帝命有司為二十四條新制奏行之

二年五月秦州刺史建忠王万俟普撥率所部入東魏帝輕騎追
之至河北千餘里不及而還

三年正月東魏寇龍門屯軍蒲坂造三道浮橋度河又遣其將竇
泰趣潼關高昂圍洛州帝出軍廣陽召諸將謂曰賊倚吾三面又
造橋示欲必度是欲綴吾軍使竇泰得西入耳且歡起兵以來泰
每先驅下多銳卒屢勝而驕今襲之必剋剋泰則歡不戰而走矣

諸將咸曰賊在近捨而襲遠若差跌悔何及也帝曰歡前再襲潼關吾軍不過霸上今者大來謂吾但自守耳又狃於得志有輕我之心乘此擊之何往不尅賊雖造橋未能徑渡比五日中吾取秦必矣庚戌帝還長安聲言欲向隴右辛亥謁魏帝而潛軍至小關竇泰卒聞軍至陳未成帝擊之盡俘其衆斬泰傳首長安高昂聞之焚輜重而走齊神武亦撤橋而退帝乃還六月帝請罷行臺魏帝復申前命授帝錄尚書事固讓乃止八月丁丑帝率李弼獨孤信梁禦趙貴于謹若干惠怡峯劉亮王惠侯莫陳崇李遠達奚武等十二將東伐至潼關帝乃誓於師曰與爾有衆奉天威誅暴亂惟爾衆士整爾甲兵戒爾戎事無貪財以輕敵無暴人以作威用命則有賞不用命則有戮爾衆士其勉之乃遣于謹先徇地至盤豆拔之獲東魏將高叔禮送于長安戊子至弘農攻之城潰禽東

魏陝州刺史李徽伯虜其戰士八千守將高千走度河命賀拔勝追禽之並送長安於是宜陽邵郡皆歸附先是河南豪傑應東魏者皆降齊神武懼率衆下蒲坂將自后土濟遣其將高昂以三萬人出河南是歲關中饑帝館穀於弘農五十餘日時軍士不滿萬人聞神武將度乃退神武遂度河逼華州刺史王罷嚴守乃涉洛軍於許原西帝至渭南徵諸州兵未會將擊之諸將以衆寡不敵請且待歡更西以觀之帝曰歡若至咸陽人情轉騷擾今及其新至可擊之卽造浮橋於渭令軍士齎三日糧輕騎度渭輜重自渭南史渭而西十月壬辰至沙苑距齊軍六十餘里神武引軍來會癸巳候騎告齊軍至帝召諸將謀李弼曰彼衆我寡不可平地置陣此東十里有渭曲可先據以待之遂進至渭背水東西爲陣李弼爲右拒趙貴爲左拒命將士皆偃戈於葭蘆中聞鼓聲而起日

晡齊軍至望見軍少競萃於左軍亂不成列兵將交帝鳴鼓士皆奮起于謹等六軍與之合戰李弼等率鐵騎橫擊之絕其軍爲二遂大破之斬六千餘級臨陣降者二萬餘人神武夜遁追至河上復大尅前後虜其卒七萬留其甲兵二萬餘悉縱歸收其輜重兵甲獻俘長安李穆曰高歡膽破矣逐之可獲帝不聽乃還軍渭南時所徵諸州兵始至乃於戰所準當時兵人種樹一株栽柳七千根以旌武功魏帝進帝柱國大將軍增邑并前五千戶李弼等十二將亦進爵增邑以左僕射馮翊王元季海爲行臺與開府獨孤信帥步騎二萬向洛陽賀拔勝李弼度河圍蒲坂蒲坂鎮將高子略定汾絳初帝自弘農入關後東魏將高昂圍弘農聞其軍敗退守洛陽獨孤信至新安昂復走度河遂入洛陽自梁陳巴西將吏

降者相屬於是東魏將堯雄趙育是云寶出潁川欲復降地帝遣儀同宇文貴梁遷等逆擊大破之趙育來降東魏復遣任祥率河南兵與堯雄合儀同怡峯與貴遷等復擊破之又遣都督韋孝寬取豫州是云寶殺其東揚州刺史邢椿以州來降

四年三月帝率諸將入朝禮畢還華州七月東魏將侯景等圍獨孤信於洛陽齊神武繼之帝奉魏帝至穀城臨陣斬東魏將莫多婁代文悉虜其眾送弘農遂進軍瀍東景等夜解圍去及旦帝率輕騎追至河上景等北據河橋南屬芒山爲陣與諸軍戰帝馬中流矢驚逸軍中擾亂都督李穆下馬授帝軍復振於是大捷斬其將高昂李猛宋顯等虜其甲士一萬五千人赴河死者萬數是日置陣旣大首尾懸遠從旦至未戰數十合氛露四塞莫能相知獨孤信李遠居右趙貴怡峯居左戰並不利又未知魏帝及帝所在

皆棄其卒先歸開府李諱念賢等爲後軍遇信等退卽與俱還由是班師洛陽亦失守大軍至弘農守將皆已棄城西走所虜降卒在弘農者因相與閉門拒守進攻拔之誅其魁首數百人大軍之東伐也關中留守兵少而前後所虜東魏士卒皆散在百姓間乃謀亂及李諱等至長安計無所出乃與太尉王明僕射周惠達輔魏太子出次渭北關中大震恐百姓相剽劫於是沙苑所俘軍人趙青雀雍州人于伏德等遂反青雀據長安子城伏德保咸陽與太守慕容思度各收降卒以拒還師長安城人皆相率拒青雀每日接戰魏帝留止閩鄉令帝討之長安父老見帝且悲且喜曰不意今日復得見公士女咸相賀華州刺史宇文導襲咸陽斬思度禽伏德南度渭與帝會攻破青雀太傅梁景獻先以疾留長安遂與青雀通謀至是亦伏誅關中乃定魏帝還長安帝復屯華州十

二月是云寶襲洛陽東魏將王元軌棄城走都督趙綱襲廣州拔之自襄廣以西城鎮復西屬

五年冬大閱於華陰

六年春東魏將侯景出三鵝將侵荊州帝遣開府李弼獨孤信各率騎出武關景乃還夏蠕蠕度河至夏州帝召諸軍屯沙苑以備之

七年十一月帝奏行十二條制恐百官不勉於職事又下令申明之

八年十月齊神武侵汾絳圍玉璧帝出軍蒲坂神武退度汾追之遂遁去十二月魏帝狩於華陰大饗將士帝帥諸將朝於行在所

九年二月東魏北豫州刺史高慎舉州來附帝帥師迎之三月齊神武據芒山陣不進者數日帝留輜重於漚曲軍士銜枚夜登芒山未明擊之神武單騎爲賀拔勝所逐僅免帝率右軍若干惠大

破神武軍悉虜其步卒趙貴等五將軍居右戰不利神武復合戰
帝又不利夜引還入關屯渭上神武進至陝開府達奚武等禦之
乃退帝以芒山諸將失律上表自貶魏帝不許於是廣募關隴豪
右以增軍旅十月大閱於櫟陽還屯華州

十年五月帝朝京師七月魏帝以帝前後所上二十四條及十二
條新制定爲中興永式命尚書蘇綽更損益之總爲五卷班於天
下於是搜簡賢才爲牧守令習新制而遺焉數年間百姓便之十
月大閱於白水

十一年十月大閱於白水遂西狩岐陽

十二年春涼州刺史宇文仲和據州反瓜州人張保害刺史成慶
以應之帝遣開府獨孤信討之東魏將侯景侵襄州帝遣開府若
于惠禦之至穰景遁去五月獨孤信平涼州禽仲和遷其百姓六

千餘家於長安瓜州都督令狐延起義誅張保瓜州平七月帝大
會諸軍於咸陽

十三年正月東魏河南大行臺侯景舉河南六州來附被圍於潁
川六月帝遣開府李弼援之東魏將韓軌等遁去景遂徙鎮豫州
於是開府王思政據潁川弼引軍還七月侯景密圖附梁帝知其
謀悉追還前後所配景將士景懼遂叛冬帝奉魏帝西狩咸陽
十四年春魏帝詔封帝長子覺爲寧都郡公初帝以平元顥納孝
莊帝功封寧都縣子至是改以爲郡以封覺用彰勤王之始也五
月魏帝進帝位太師帝奉魏太子巡撫西境登隴刻石紀事遂至
原州歷北長城太守東趣五原至蒲州聞魏帝不豫而還及至魏
帝疾已愈乃還華州是歲東魏將高岳圍王思政於潁川
十五年春帝遣大將軍趙貴帥師援王思政高岳堰洧水以灌城

穎川以北皆為陂澤救兵不得至六月穎川陷初侯景圍建鄴梁
司州刺史柳仲禮赴臺城梁竟陵郡守孫暠以郡內附帝使大都
督符貴鎮之及建鄴陷仲禮還司州來寇暠以郡叛帝大怒十一
月遣開府楊忠攻尅隨州進圍仲禮長史馬岫於安陸

十六年正月仲禮來援安陸楊忠逆擊於滌頭大破之禽仲禮馬
岫以城降三月魏帝封帝第二子震為武邑公七月帝東伐拜章
武公導為大將軍總督留守諸軍屯涇北鎮關中九月丁巳軍出
長安連雨自秋及冬諸軍馬驢多死遂於弘農北造橋濟河自蒲
坂於是河南自洛陽河北自平陽以東遂入齊

十七年三月魏文帝崩皇太子嗣位帝以冢宰總百揆十月帝遣
大將軍王雄出子午伐上津魏興大將軍達奚武出散關伐南鄭
廢帝元年春王雄平上津魏興以其地置東梁州四月達奚武圍

南鄭月餘梁州刺史宜豐侯蕭修以州降武八月東梁州百姓圍
州城帝復遣王雄討之

二年正月魏帝詔帝為左丞相大行臺都督中外諸軍事二月東
梁州平遷其豪帥於雍州三月帝遣大將軍魏安公尉遲迴帥師
伐梁武陵王蕭紀於蜀四月帝勒銳騎三萬西踰隴度金城河至
姑臧吐谷渾震懼遣使獻其方物七月帝至自姑臧八月尉遲迴
尅成都劔南平十一月尚書元烈謀亂伏誅

三年正月始作九命之典以叙內外官爵以第一品為九命第九
品為一命改流外品為九秩亦以九為上又改置州郡縣凡改州
四十六置州一改郡一百六改縣三百三十魏帝有怨言於是帝
與公卿議廢帝立齊王廓是為恭帝

恭帝元年四月帝大饗羣臣魏史柳虬執簡書于朝曰廢帝文

皇帝之嗣子年七歲文皇帝託於安定公曰是子也才由于公不才亦由于公公宜勉之公既受茲重寄居元輔之任又納女爲皇后遂不能訓誨有成致令廢黜負文皇帝付屬之意此咎非安定公而誰帝乃令太常盧辨作誥諭公卿曰呼嗚我羣后暨衆士維文皇帝以襁褓之嗣託於子訓之誨之庶厥有成而子罔能弗變厥心庸暨乎廢墜我文皇帝之志嗚呼茲咎予其焉避子實知之矧爾衆人之心哉惟予之顏豈惟今厚將恐來世以予爲口實乙亥魏帝詔封帝子邕爲輔城公憲爲安城公七月西狩至原州梁元帝遣使請據舊圖以定疆界又連結於齊言辭悖慢帝曰古人有言天子之所棄誰能與之其蕭繹之謂乎十月壬戌遣柱國于謹中山公護與將軍楊忠韋孝寬等步騎五萬討之十一月癸未師濟漢中山公護與楊忠率銳騎先屯其城下景申于謹至江陵

列營圍守辛亥尅其城戕梁元帝虜其百官士庶以婦沒爲奴婢者十餘萬免者二百餘家立蕭詧爲梁主居江陵爲魏附庸魏氏之初統國三十六大姓九十九後多絕滅至是以諸將功高者爲三十六國後次者爲九十九姓後統軍人亦改從其姓

二年梁廣州刺史王琳寇邊十月帝遣大將軍豆盧寧帥師討之三年正月丁丑初行周禮建六官魏帝進帝位太師大冢宰帝以漢魏官繁思革前弊大統中乃令蘇州盧辯依周制改創其事尋亦置六卿官然爲撰次未成衆務猶躍臺閣至是始畢乃命行之四月帝北巡七月度北河魏帝封帝子直爲秦郡公招爲正平公九月帝不豫還至雲陽命中山公護受遺輔嗣子十月乙亥帝薨于雲陽宮還長安發喪時年五十二月甲申葬于成陵謚文公及孝閔帝受禪追尊爲文王廟曰太祖武成元年追尊爲文皇帝

帝知人善任使從諫如順流崇尚儒術明達政事恩信被物能駕馭英豪一見之者咸思用命沙苑所獲囚俘釋而用之及河橋之役以充戰士皆得其死力諸將出征授以方略無不制勝性好朴素不尚虛飾恒以反風俗復古始爲心云

孝閔皇帝諱覺字陀羅尼文帝第三子也母曰元皇后大統八年生於同州七歲封略陽郡公時善相者史元華見帝退謂所親曰此公子有至貴相但恨不壽耳魏恭帝三年三月命爲安定公世子四月拜大將軍十月乙亥文帝崩景子世子嗣位爲太師大冢宰十二月丁亥魏帝詔以岐陽地封帝爲周公庚子詔禪位于帝曰子聞皇天之命不于常惟歸于德故堯授舜舜授禹時宜也天厭我魏邦垂變以告惟爾罔弗知予雖不明敢弗冀天命格有德哉今踵唐虞舊典禪位于周庸布告爾焉使大宗伯趙貴持節奉

冊書曰咨爾周公帝王之位弗常有德者受命時乃天道予式時庸荒求于唐虞之彛踵曰我魏德之終舊矣我封小大罔弗知今其可亢佛于天道而不歸有德歟時用詢謀僉曰公昭考文公格勲德于天地不濟黔黎洎公又躬宣重光故玄象徵見于上謳訟奔走于下天之曆數用實在焉予安敢弗若是以欽祇聖典遜位于公公其享茲天命保有萬國可不慎歟魏帝臨朝遣戶部中大夫濟北公元迪致皇帝璽綬帝固辭公卿百辟勸進太史陳祥瑞乃從之是日魏帝遜位于大司馬府

元年春正月天王卽位柴燎告天朝百官于路門追尊皇考文公爲文王皇妣爲文后大赦封魏帝爲宋公是日槐里獻赤雀百官奏議曰帝王之興罔弗更正朔明受之於天革人視聽也逮于尼甫稽諸陰陽云行夏之時後王所不易今魏曆告終周室受命以

木承水實當行錄正用夏時式遵聖道惟文王誕玄氣之祥有黑
水之讖服色宜尚焉制曰可以大司徒趙郡王李弼爲太師以大
宗伯南陽公趙貴爲太傅大冢宰以大司馬河內公獨孤信爲太
保以大宗伯中山公護爲大司馬以大將軍寧都公毓高陽公達
奚武武陽公豆盧寧小司寇陽平公子遠小司馬博陵公賀蘭祥
小宗伯魏安公尉遲迴並爲柱國壬寅祀圓丘詔曰予本自神農
其於二丘宜作厥主始祖獻侯啟土遼海配南北郊文考德符五
運受天明命祖于明堂以配上帝癸卯祀方丘甲辰遂祭太社初
除市門稅乙巳享太廟丁未會于乾安殿班賞各有差戊申詔有
司分命使者巡察風俗求人得失禮餼高年恤于鰥寡辛亥祀南
郊壬子立王后元氏辛酉享太廟癸亥親耕藉田二月癸酉朔朝
日于東郊戊寅祭太社丁亥柱國楚國公趙貴謀反伏誅太保獨

孤信罪免甲午以大司空梁國公侯莫陳崇爲太保大司馬晉國
公護爲大冢宰柱國博陵公賀蘭祥爲大司馬高陽公達奚武爲
大司寇大將軍化政公宇文貴爲柱國三月巳酉衛國公獨孤信
賜死癸亥省六府士員三分之一夏四月壬申降死罪巳下囚壬
午謁成陵丁亥享太廟五月巳酉帝將觀漁於昆明池博士姜頊
諫乃止秋七月壬寅帝聽訟於右寢多所哀宥辛亥享太廟八月
戊辰祭太社辛未降死罪巳下囚甲午詔二十四軍舉賢良九月
庚申改太守爲郡守帝性剛果忌晉公護之專司會李植軍司馬
孫恒以先朝佐命入侍左右亦疾護權重乃與宮伯乙鳳賀拔提
等潛請帝誅護帝許之又引宮伯張先洛先洛以白護護乃出植
爲梁州刺史恒爲潼州刺史鳳等更奏帝將召羣臣入因此誅護
先洛又白之時小司馬尉綱總統宿衛兵護乃召綱入殿中詐呼

鳳等論事以次執送護第並誅之綱仍罷禁兵帝無左右獨在內
殿以宮人執兵自守護遣大司馬賀蘭祥逼帝遜位貶爲略陽公
遂幽於舊邸月餘日以弒崩時年十六植恒等亦遇害及武帝誅
護後乃詔曰故略陽公至德純粹天姿秀傑屬魏祚告終寶命將
改謳歌允集曆數攸歸上協蒼靈之慶下昭后祇之錫而禍生肘
腋釁起蕭牆白武噬驂蒼鷹集殿幽辱神器弒酷乘輿寃結生靈
毒流寓縣今河海澄清氛沴消蕩追尊之禮宜崇徽號遣太師蜀
國公迴於南郊上謚曰孝閔皇帝陵曰靜陵

世宗明皇帝諱毓小名統萬突文皇帝之長子也母曰姚夫人永
熙三年文帝臨夏州生於統萬城因以名焉大統十四年封寧都
郡公魏恭帝三年累遷大將軍鎮隴右孝閔踐阼進位柱國轉岐
州刺史有美政及孝閔廢晉公護遣迎帝於岐州九月癸亥至京

師止於舊邸羣臣上表勸進備法駕奉迎帝固讓羣臣固請乃許
之

元年秋九月天王卽位大赦乙丑朝羣臣於延壽殿冬十月癸酉
太師趙國公李弼薨己卯以大將軍昌平公尉綱爲柱國乙酉祀
圓丘景戌祀方丘甲午祭太社陽平公李遠賜死辛未梁敬帝遜
位于陳十一月庚子享太廟丁未祀圓丘十二月庚午謁成陵庚
辰以大將軍輔城公邕爲柱國戊子赦長安見囚甲午詔元氏子
女自坐趙貴等事以來所有沒入爲官口者悉免之

二年春正月乙未以大冢宰晉公護爲太師辛亥親耕藉田癸丑
立王后獨孤氏丁巳於雍州置十二郡三月甲午北豫州刺史司
馬消難舉州來附改雍州刺史爲牧京兆郡守爲尹庚申詔三十
六國九十九姓自魏南徙皆稱河南人今周室旣都關中宜改稱

京兆人夏四月乙巳以太師晉公護爲雍州牧辛未降死罪囚一
等五歲刑巳下皆原之甲戌天王后獨孤氏崩甲申塋敬后五月
乙未以大司空梁國公侯莫陳崇爲大宗伯六月癸亥嘸噠國遣
使朝貢巳巳板授高年刺史守令恤鰥寡孤獨各有差分長安爲
萬年縣並居京城壬申遣使分行州郡理囚徒察風俗掩骸埋骨
秋七月順陽獻三足鳥八月甲子羣臣上表稱慶於是大赦文武
音進級九月辛卯以大將軍楊忠王雄並爲柱國甲辰封少師元
羅爲韓國公以紹魏後丁未行幸同州故宅賦詩冬十月辛酉突
厥遣使朝貢癸亥太廟成乙亥以功臣琅邪貞獻公賀拔勝等十
三人配享文帝廟庭壬午大赦

武成元年春正月巳酉太師晉公護上表歸政帝始親萬機軍旅
猶總於護初改都督諸州軍事爲總管三月癸巳陳六軍帝親擐

甲冑迎太白於東方吐谷渾寇邊庚戌遣大司馬博陵公賀蘭祥
率衆討之夏五月戊子詔有司造周曆巳亥聽訟於正武殿辛亥
以大宗伯梁國公侯莫陳崇爲大司徒大司寇高陽公達奚武爲
大宗伯武陽公豆盧寧爲大司寇柱國輔城公邕爲大司空乙卯
詔曰比屢有紕發官司赦前事者有司自今勿推究唯庫廩倉廩
與海內所共漢帝有云朕爲天下守財耳若有侵盜公家財畜錢
粟者魏朝之事年月旣遠一不須問自周有天下以來雖經赦宥
事迹可知者有司宜卽推窮得實之日免其罪徵備如法賀蘭祥
攻拔洮陽洪和二城吐谷渾遁走閏月高昌遣使朝貢六月戊子
大雨霖詔公卿大夫士爰及牧守黎庶等令各上封事讜言極諫
無有所諱其遭水者有司可時巡檢條列以聞庚子詔曰潁川從
我是曰元勳無忘父城實起王業文考屬天地草昧造化權輿拯

彼流亡臣茲頽運賴英賢盡力文武同心翼贊大功克隆帝業而
被堅執銳櫛風沐雨永言疇昔良用憮然若功名遂建國割符
子唯休也其有致死王事妻子無歸者朕甚傷之凡從先王向夏
州發夏州從來見在及薨亡者並量賜錢帛稱朕意焉是月陳武
帝殂秋八月己亥改天王稱皇帝追尊文王爲文皇帝大赦改元
癸丑增御正四人位上大夫冬十月齊文宣帝殂

二年春正月癸丑朔大會羣臣于紫極殿始用百戲三月辛酉重
陽閣成會羣臣公侯列將卿大夫及突厥使於芳林園賜錢帛各
有差夏四月帝因食糖粳遇毒庚子大漸詔曰人生天地之間稟
五常之氣天地有窮已五常有推移人安得長在是以有生有死
者物理之必然處必然之理修短之間何足多恨朕雖不德性好
典墳披覽聖賢餘論未嘗不以此自曉今乃命也夫復何言諸公

及在朝卿士大夫軍中大小督將軍人等並立勲效積有年載輔
翼太祖成我周家令朕繼承大業應萬乘之上此上不負太祖下
不負朕躬朕得啟手啟足從先帝於地下實無恨于心矣所可恨
者朕享大位可謂四年矣不能使政化修理黎庶豐足九州未一
二方猶梗顧此恨恨目用不瞑唯冀仁兄冢宰洎朕先正先父公
卿大臣等協和爲心勉力相勸勿忘太祖遺志提挈後人朕雖沒
九泉形骸不朽今大位虛曠社稷無主朕兒幼少未堪當國魯國
公邕朕之介弟寬仁大度海內共聞能弘我周家必此子也夫人
貴有始終公等事太祖輔朕躬可謂有始矣若克念政道顧其艱
難輔邕以王天下者可謂有終矣哀死事生人臣大節公等可思
念此言令萬代稱難朕稟生儉素非能力行菲薄每寢大布之被
服大帛之衣凡是器用皆無彫刻身終之日豈容違棄此好喪事

所須務從儉約斂以時服勿使有金玉之飾若以禮不可闕皆令用瓦小斂訖七日哭文武百官各權辟麻苴以素服從事葬日選擇不毛之地因勢爲墳勿封勿樹且厚塋傷生聖人所誠旣服膺聖人之教安敢違之凡百官司勿異朕意四方州鎮使到各令三日哭訖權辟凶服還以素服從事特大例除非有呼召各按部自守不得輒奔赴闕庭禮有通塞隨時之義塋訖內外悉除服從吉三年之內勿禁婚娶一令如平常也時事殷猥病困心亂止能及此如事有不盡準此以類爲斷死而可忍古人有之朕今忍死盡此懷抱其詔卽帝口授也辛丑帝崩於延壽殿時年二十七謚曰明皇帝廟號世宗五月辛未塋於昭陵帝寬明仁厚敦睦九族有君人之量幼而好學博覽羣書善屬文詞彩溫麗及卽位集公卿已下有文學者八十餘人於麟趾殿刊校經史又摺採衆書自

義農已來訖于魏末叙爲世譜凡百卷所著文章十卷

論曰昔者水運將終羣凶放命或權威震主或釁逆滔天咸謂大寶可以方致神器可以求得而卒誅夷繼及亡不旋踵是知天命有底庸可怡乎周文爰自潛躍衆無一旅驅馳戎馬之際躡足行伍之間時屬與能運膺啟聖鳩集義勇糾合同盟一舉而殄仇讎再駕而匡帝室於是內詢帷幄外杖材雄推至誠以待人弘大順以訓物高氏藉甲兵之衆恃戎馬之強屢入近畿志圖吞噬及英謀電發神旆風馳弘農建城濮之勲沙苑有昆陽之捷取威定霸以弱爲強紹元宗之衰緒創隆周之景命南清江漢西舉巴蜀北控沙漠東據伊瀍乃擯落魏晉憲章古昔修六官之廢典成一代之鴻規德刑並用勲賢兼叙遠安邇悅俗阜人和億兆之望有歸揖讓之期允集功業若此人臣以終盛矣哉非求雄略冠時英姿

不世天與神授緯武經文者孰能與於此乎昔漢獻蒙塵曹公成
夾輔之業晉安播蕩宋武建匡合之勲校德論功綽有餘裕至於
渚官制勝闔城孥戮蠕蠕命盡種誅夷雖事出於權道而用乖
於德教斯爲過矣孝閔承旣安之業膺樂推之運明皇處代邸之
尊纂大宗之緒始則權臣專命終乃政出私門俱懷芒刺之疑用
致幽弑之禍惜哉

北史卷九

周本紀上第九

終

魏川中圖書
氏書同商

北史卷十

周本紀下第十

魏川中圖書
氏書同商

高祖武皇帝諱邕字禰羅突文帝第四子也母曰叱奴太后魏大
統九年生於同州有神光照室帝幼而孝敬聰敏有器質文帝異
之曰成吾志者此兒也年十二封輔城郡公孝閔帝踐阼拜大將
軍出鎮同州明帝卽位遷柱國授蒲州刺史入爲大司空行御正
進封魯國公領宗師甚見親愛參議朝廷大事性沉深有遠識非
因問終無所言帝每歎曰夫人不言言必有中武成二年四月帝
崩遺詔傳位於帝帝固讓百官勸進乃從之壬寅卽皇帝位大赦
冬十二月改作路門是歲齊孝昭帝廢其主殷而自立
保定元年春正月戊申改元文武百官各增四級以大冢宰晉公
護爲都督中外諸軍事令五府總於天官庚戌祀圓丘壬子祀方

丘甲寅祀感帝于南郊乙卯祭太社己巳享太廟班文帝所述六
官於廟庭甲戌板授高年官各有差乙亥親耕籍田景子大射於
正武殿賜百官各有差二月己卯遣大使巡察天下風俗甲午朝
日於東郊景午省輦輿去百戲三月景寅改八丁兵爲十二丁兵
率歲一月役夏四月景子朔日有蝕之庚寅以少傅吳公尉綱爲
大司空丁酉白蘭遣使獻犀甲鐵鎧五月景午封孝閔皇帝子康
爲紀國公皇子贇爲魯國公晉公護獲玉斗以獻六月乙酉遣御
正殷不害使於陳秋七月戊申以旱故詔所在降死罪已下囚更
鑄錢文曰布泉以一當五與五銖竝行九月甲辰南寧州使獻滇
馬及蜀鎧冬十月甲戌朔日有蝕之十一月乙巳陳人來聘丁巳
狩于岐陽是月齊孝昭帝殂十二月車駕至自岐陽是歲突厥吐
谷渾高昌宕昌龜茲等國竝遣使朝貢

二年春正月壬寅初於蒲州開河渠同州開龍首渠以廣漑灌丁
未以陳主弟頊爲柱國送還江南閏月己亥大司馬涼公賀蘭祥
薨二月癸丑以久不雨宥罪人京城三十里內禁酒梁主蕭啓薨
夏四月甲辰以旱故禁屠宰癸亥詔曰諸柱國等勳德隆重宜有
優崇各準別制邑戶聽寄食他縣五月庚午以南山衆瑞竝集免
今年役及租賦之半壬辰以柱國隋公楊忠爲大司空六月己亥
以柱國蜀公尉迴爲大司馬分山南荊州安州襄州江陵爲四總
管秋九月戊辰朔日有蝕之陳人來聘冬十月辛亥帝御大武殿
大射戊午講武於少陵原十一月丁卯以大將軍衛公直趙公招
竝爲柱國

三年春正月辛未改光遷國爲遷州乙酉太保梁公侯莫陳崇賜
死二月庚子初頒新律辛酉詔自今舉大事行大政非軍機急速

皆依月令以順天心三月乙丑朔日有蝕之景子宕昌國獻生猛獸二詔放之南山夏四月乙未以柱國鄭公達奚武爲太保大將軍韓果爲柱國己亥帝御正武殿錄囚徒癸卯大雩癸丑有牛足生于背戊午幸太學以太傅燕公于謹爲三老而問道焉初禁天下報讎犯者以殺人論壬戌詔百官及庶人上封事極言得失五月甲午朔以旱故避正寢不受朝甲戌雨秋七月戊辰行幸原州庚午陳人來聘丁丑幸津門問百年賜以金帛又賜高年板職各有差降死罪囚一等八月丁未改作路寢九月甲子自原州登隴山景戌幸同州戊子詔柱國楊忠率騎一萬與突厥伐齊己丑初令世襲州郡縣者悉改爲五等爵州封伯郡封子縣封男冬十月庚戌陳人來聘十二月辛卯車駕至自同州遣太保達奚武率騎三萬出平陽以應木忠是月有人生子男而陰在背後如尾兩足

指如獸爪有犬生子腰以後分爲二身兩尾六足

四年春正月庚申楊忠破齊長城至晉陽而還二月庚寅朔日有蝕之三月庚辰初令百官執笏夏四月癸卯以柱國鄧公竇熾爲大宗伯五月壬戌封明帝長子賢爲畢公癸酉以大將軍安武公李穆爲柱國丁亥改禮部爲司宗大司禮爲禮部大司樂爲樂部六月庚寅改御伯爲納言秋七月焉耆國遣使獻名馬八月丁亥朔日有蝕之詔柱國楊忠帥師與突厥東伐至北河而還戊子以柱國齊公憲爲雍州牧以許公宇文貴爲大司徒九月丁巳以柱國衛公直爲大司空陳人來聘是月以皇世母閻氏自齊至大赦閏月己亥以大將軍韋孝寬長孫儉竝爲柱國冬十月癸亥以大將軍陸通宇文盛蔡公廣竝爲柱國甲子詔大冢宰晉公護伐齊齋於太廟庭授以斧鉞於是護總大軍出潼關大將軍權景宣帥

山南諸軍出豫州少師楊擲出軹關丁卯帝幸沙苑勞師癸酉還宮十一月甲午柱國尉遲迥圍洛陽柱國齊公憲營芒山晉公護次陝州十二月景辰齊豫州刺史王士良以州降壬戌齊師度河晨至洛陽諸軍驚散尉迥帥麾下數十騎扞敵得却至夜引還柱國王雄力戰死之遂班師楊擲於軹關戰沒權景宣亦棄豫州而還是歲突厥粟特等國竝遣使朝貢

五年春正月甲申朔以柱國王雄死王事故廢朝乙巳以雄世子謙爲柱國二月辛丑詔陳公純等逆皇后于突厥景寅以柱國李穆爲大司空綏德公陸通爲大司寇壬申行幸岐州戊子柱國豆盧寧薨夏四月齊武成帝禪位於其太子緯自稱太上皇帝五月己亥左右武伯各置中大夫一人六月庚申彗星出三台入文昌犯上將經紫宮入苑漸長丈餘百餘日乃滅辛未詔江陵人年六

十五已上爲官奴婢者已令放免其公私奴婢年七十以外者所在官私宜贖爲庶人秋七月辛巳朔日有蝕之庚寅行幸秦州降死罪已下刑辛丑遣大使巡察天下八月景子車駕至自秦州冬十月辛亥改函谷關城爲通洛防十一月丁未陳人來聘是歲吐谷渾遣使朝貢

天和元年春正月己卯朔日有蝕之辛巳考路寢命群臣賦古詩京邑耆老亦會焉頒賜各有差癸未大赦改元百官普加四級己亥親耕籍田丁未於宕昌國置宕州遣小載師杜果使于陳二月戊辰詔三公已下各舉所知庚午日鬪光遂微日中見烏三月景午祀南郊夏四月辛亥雩是月陳文帝殂五月庚辰帝御正武殿集群臣親講禮記吐谷渾龍涸王莫昌率戶內附以其地爲扶州甲午詔曰甲子乙卯禮云不樂萑弘表昆吾之稔杜蕢有揚驪之

文自世道喪亂禮儀紊毀此典茫然已墜於地宜依是日有事停樂庶知爲君之難爲臣不易貽之後昆殷鑒斯在六月景午以大將軍辛威爲柱國秋七月戊寅築武功郿斜谷武都留谷津坑諸城以置軍人壬午詔諸胄子入學但束修於師不勞釋奠釋奠者學成之祭自今卽爲恒式八月己未詔諸有三年之喪或負土成墳或寢苦骨立一志一行可稱獎者本部官司隨事上言當加弔勉以勵薄俗九月乙亥信州蠻反詔開府陸騰討平之冬十月甲子初造山雲儻以備六代樂十一月景戌行幸武功等城十二月庚申還宮

二年春正月癸酉朔日有蝕之己亥親耕籍田三月癸酉改武遊園爲道會苑丁亥初立郊丘壇壝制度夏四月乙巳省併東南諸州以大將軍陳公純爲柱國六月辛亥尊所生叱奴氏爲皇太后閏月庚午地震戊寅陳湘州刺史華皎帥衆來附壬辰以大將軍譙公儉爲柱國秋七月辛丑梁州上言鳳凰集楓樹群鳥列侍以萬數甲辰立路門學置生七十二人壬子以太傅燕公于謹爲雍州牧九月衛公直等與陳將淳于量吳明徹戰于沌口王師敗績元定以步騎數千先度遂沒江南冬十一月戊戌朔日有蝕之癸丑太保許國公宇文貴薨是歲突厥吐谷渾安息等國竝遣使朝貢

三年春正月辛丑祀南郊三月癸卯皇后阿史那氏至自突厥甲辰大赦丁未大會百寮及賓客于路寢戊午太傅燕公于謹薨夏四月辛巳以太保達奚武爲太傅大司馬尉迴爲太保柱國齊公憲爲大司馬五月庚戌享太廟六月甲戌有星孛于東井秋七月壬寅柱國隋公楊忠薨八月乙丑韓公元羅薨齊人來聘請和親

詔軍司馬陸逞報聘癸酉帝御大德殿集百寮及沙門道士等親講禮記冬十月癸亥享太廟丁亥上親帥六軍講武於城南京邑觀者輿馬彌漫數十里諸蕃使咸在焉十一月壬辰朔日有蝕之壬子遣開府崔彥穆使於齊甲寅陳安成王頊廢其主伯宗而自立辛未齊武成帝殂

四年春正月辛卯朔以齊武成殂故廢朝遣司會李綸等會葬於齊二月戊辰帝御大德殿集百寮道士沙門等討論釋老夏四月己巳齊人來聘五月己丑帝製象經成集百寮講說封魏廣平公子元謙爲韓國公以紹魏後丁巳柱國吳公尉綱薨六月築原州及涇州東城秋七月突厥遣使獻馬柱國昌寧公長孫儉薨

五年春三月甲辰初令宿衛官住關外者將家累入京不樂者解宿衛夏四月甲寅以柱國宇文盛爲大宗伯省帥都督官景寅遣

大使巡察天下六月景子以皇女生故降宥罪人并免逋租懸調

冬十月辛巳朔日有蝕之丁酉太傅鄭公達奚武薨十一月丁卯

柱國幽公廣薨十二月癸巳大將軍鄭恪帥師平越雋置西寧州

是月齊將斛律光侵邊於汾北築城自華谷至龍門

六年春正月己酉朔以路門未成故廢朝丁卯以大將軍王傑譚

公會鴈門公田弘魏公李暉等竝爲柱國三月己酉齊公憲自龍

門度河斛律光退保華谷憲攻拔其新築五城夏四月戊寅朔日

有蝕之辛卯信州蠻反遣大將軍趙閭帥師討平之庚子以大將

軍司馬消難侯莫陳瓊大安公閻慶神武公竇毅南陽公叱羅協

平高公侯伏侯龍恩竝爲柱國五月癸亥遣納言鄭詡使於陳景

寅以大將軍李諱中山公訓杞公亮上庸公陸騰安義公宇文丘

北平公寇紹許公宇文善健爲公高琳鄭公達奚震隴東公楊纂

常山公于翼竝爲柱國六月乙未以大將軍太原公王秉爲柱國是月齊將段季先攻陷汾州秋七月乙丑以大將軍越公盛爲柱國八月癸酉省掖庭四夷樂後宮羅綺工五百餘人冬十月壬午冀公通薨乙未遣右武伯谷會現使于齊壬寅上親帥六軍講武於城南十一月壬子以大將軍梁公侯莫陳芮大將軍李意竝爲柱國景辰齊人來聘丁巳行幸散關十二月己丑還宮是冬牛疫死者十六七

建德元年春正月戊午帝幸玄都觀親御法座講說公卿道俗論難事畢還宮降死罪及流罪一等其五歲刑已下竝宥之二月癸酉遣大將軍昌城公深使于突厥司宗李際使於齊乙酉柱國安義公宇文丘薨三月癸卯朔日有蝕之齊人來聘景辰誅大冢宰晉公護及其子柱國譚公會并柱國侯伏侯龍恩及其弟大將軍

萬壽大將軍劉勇等大赦改元罷中外府癸亥以太傅尉迥爲太師柱國竇熾爲太傅大司空李穆爲太保齊公憲爲大冢宰衛公直爲大師徒趙公招爲大司空柱國辛威爲大司寇綏德公陸通爲大司馬詔曰人勞不止則星動于天作事不時則石言于國頃興造無度徵發不已加以頻歲師旅農畝廢業去秋災蝗年穀不登自今正調以外無妄徵發夏四月甲戌以代公達滕公道竝爲柱國己卯詔公卿已下各舉所知遣工部代公達使於齊景戌詔百官軍人上封事極言得失丁亥詔斷四方非常貢獻庚寅追尊略陽公爲孝閔皇帝癸巳立魯公賈爲皇太子大赦百官各加封級五月壬戌以大旱集百官於庭詔之曰亢陽不雨豈朕德薄刑賞乖中歟將公卿大臣或非其人歟宜盡直言無有所隱公卿各引咎自責其夜澍雨六月庚子改置宿衛官員秋七月辛丑陳人

來聘九月庚子朔日有蝕之庚申扶風掘地得玉盃以獻冬十月
庚午詔江陵所獲俘虜充官口者悉免爲百姓辛未遣小匠師楊
總使于陳大司馬綏德公陸通薨十一月景午上親御六軍講武
于城南庚戌行幸羌橋集京城東諸都督以上頒賜各有差乙卯
還宮壬戌以大司空趙公招爲大司馬十二月壬申行幸斜谷集
京城以西諸軍都督以上頒賜有差景戌還宮己丑帝御正武殿
親錄囚徒至夜而罷庚寅幸道會苑以上善殿壯麗遂焚之

二年春正月辛丑祀南郊乙巳以柱國田弘爲大司空大將軍若
干鳳爲柱國庚戌復置帥都督官乙卯享太廟閏月己巳陳人來
聘二月甲寅詔皇太子贊巡撫西土壬戌遣司會侯莫陳凱使於
齊省雍州內八部併入京兆馮翊扶風咸陽等郡三月己卯皇太
子於岐州獲白鹿二以獻詔答曰在德不在瑞癸巳省六府諸司

中大夫以下官府置四司以下大夫爲官之長上士貳之夏四月
己亥享太廟景辰增改東宮官員五月丁丑以柱國侯莫陳瓊爲
大宗伯榮陽公司馬消難爲大司寇上庸公陸騰爲大司空六月
庚子省六府員外諸官皆爲丞壬子皇孫衍生文武官普加一級
大階大選諸軍將帥景辰帝御路寢集諸軍將勛以戎事庚申詔
諸軍旗旌皆畫以猛獸鷙鳥之象秋七月己巳享太廟自春末不
雨至於是月壬申集百寮于大德殿帝責躬罪已問以時政得失
戊子雨八月景午改三夫人爲三妃關中大蝗九月乙丑陳人來
聘戊寅詔曰頃者婚嫁競爲奢靡有司宜加宣勒使遵禮制冬十
月癸卯齊人來聘甲辰奏六代樂成帝御崇信殿集百官觀之十
一月辛巳帝親帥六軍講武於城東癸未集諸軍都督以上五十
人於道會苑大射帝親臨射堂大備軍容十二月癸巳集群官及

沙門道士等帝升高座辨釋三教先後以儒教爲先道教次之佛
教爲後以天將軍赫連達爲柱國詔軍人之間年多耆壽可頒授
老職使榮沾邑里戊午聽訟于正武殿自旦及夜繼之以燭

三年春正月壬戌朝群臣於路門冊柱國齊公憲衛公直趙公招
譙公儉陳公純越公盛代公達滕公道竝進爵爲王己巳享太廟
庚午突厥遣使獻馬癸酉詔自今男年十五女年十三以上爰及
鰥寡所在以時嫁娶務從節儉乙亥親耕籍田景子初服短衣享
二十四軍督將以下試以軍旅之法縱酒盡歡詔以往歲年穀不
登令公私道俗凡有貯積粟麥者皆準口聽留已外盡糶二月壬
辰朔日有蝕之丁酉紀公庚畢公賢鄧公貞宋公實漢公贊秦公
贄曹公允竝進爵爲王景午令六府各舉賢良清正之士癸丑柱
國許公宇文善有罪免景辰大赦三月癸酉皇太后叱奴氏崩帝

居倚廬朝夕共一溢米群臣表請累旬乃止詔皇太子贊總庶政
夏四月乙卯齊人來弔賜會葬丁巳有星孛于東井五月庚申葬
文宣后於永固陵帝袒跣至陵所辛酉詔曰齊斬之情經籍彝訓
近代沿革遂亡斯禮伏奉遺令旣葬便除攀慕几筵情實未忍三
年之喪達于天子古今無易之道王者之所常行但時有未諧不
得全制軍國務重庶有聽朝衰麻之節苦廬之禮率遵前典以申
罔極百寮以下宜遵遺令公卿上表固請俯就權制過葬卽吉帝
不許引古答之群臣乃止于是遂申三年之制五服之內亦令依
禮初置太子諫議員四人文學十人皇子皇弟友員各二人學士
六人戊辰詔故晉公護及諸子竝追復先封改葬加諡景子初斷
佛道二教經像悉毀罷沙門道士竝令還俗并禁諸淫祀非祀典
所載者盡除之六月丁未集諸軍將教以戰陣之法壬子更鑄五

行大布錢以一當十與布泉錢竝行戊午詔曰至道弘深混成無際體包空有理極幽玄但歧路旣分源流逾遠淳離朴散形器斯乖遂使三墨八儒朱紫交競九流七略異說相騰道隱小成其來舊矣不有會歸爭驅靡息今可立通道觀聖哲微言先賢典訓金科玉篆祕蹟玄文可以濟養黎元扶成教義者竝宜弘闡一以貫之俾夫翫培塿者識嵩岱之崇崛守磧礫者悟渤澥之泓澄不亦可乎秋七月庚申行幸雲陽宮乙酉衛王直在京及欲突入蕭章門司武尉遲運等拒守直敗遁走戊子車駕至自雲陽宮八月辛卯禽直于荊州免爲庶人冬十月景申詔御正楊尚希使於陳庚子詔蒲州人遭饑乏絕者令向郿城以西及荊州管內就食甲寅行幸蒲州乙卯曲赦蒲州見囚大辟以下景辰行幸同州十一月戊午于闐遣使獻名馬已巳大閱於同州城東甲戌車駕至自同

州十二月戊子大會衛官及軍人以上賜錢帛各有差景申改諸軍軍人竝名侍官癸卯集諸軍講武於臨臯澤涼州比年地震壞城郭地裂涌泉出

四年春正月戊辰初置營軍器監壬申布寬大之詔多所蠲免二月景戌朔日有蝕之辛卯改置宿衛官員已酉柱國廣德公李意有罪免三月景辰遣小司寇元衛使于齊郡縣各省主簿一人甲戌以柱國趙王招爲雍州牧夏四月甲午柱國燕公于實有罪免丁酉初令上書者竝爲表於皇太子以下稱啓秋七月己未禁五行大布錢不得出入關布泉錢聽入而不聽出甲戌陳人來聘景子召大將軍以上於大德殿帝親諭以伐齊之旨言往以政出權宰無所措懷自親覽萬機便圖東討惡衣菲食繕甲練兵數年以來戰備稍足而僞主昏虐恣行無道伐暴除亂斯實其時群臣咸

稱善丁丑下詔暴齊氏過惡以柱國陳王純爲前一軍總管榮陽公司馬消難爲前二軍總管鄭公達奚震爲前三軍總管越王盛爲後一軍總管周昌公侯莫陳瓊爲後二軍總管趙王招爲後三軍總管齊王憲帥衆二萬趣黎陽隋公楊堅廣寧公侯莫陳迴舟師三萬自渭入河柱國梁公侯莫陳芮帥衆一萬守太行道申國公李穆帥衆三萬守河陽道常山公于翼帥衆二萬出陳汝壬午上親帥六軍衆六萬直指河陰八月癸卯入齊境禁伐樹殘苗稼犯者以軍法從事丁未上親帥諸軍攻拔河陰大城攻子城未尅上有疾九月辛酉夜班師水軍焚舟而退齊王憲于翼李穆等所在尅捷降拔三十餘城皆棄而不守唯以王藥城要害令儀同三司韓正守之正尋以城降齊戊寅至自東伐冬十月戊子初置上柱國上大將軍官改開府儀同三司爲開府儀同大將軍又置上

開府上儀同官閏月以柱國齊王憲蜀公尉遲迴爲上柱國詔諸畿郡各舉賢良十一月己亥改置司內官員十二月辛亥朔日有蝕之景子陳人來聘是歲岐寧二州人饑開倉振恤

五年春正月辛卯行幸河東涑州集關河東諸軍校獵甲午還同州丁酉詔分遣大使周省四方察訟聽謠問人卹隱廢布泉錢戊申初令鑄錢者至絞從者遠配二月辛酉遣皇太子賁巡撫西土仍討吐谷渾三月壬寅車駕至自同州文宣皇太后服再替戊申祥夏六月戊申朔日有蝕之辛亥享太廟景辰利州總管紀王康有罪賜死秋七月乙未京師旱八月戊申皇太子入吐谷渾至伏俟城而還乙丑陳人來聘九月丁丑大醮於正武殿以祈東伐冬十月帝復諭群臣伐齊以去歲屬有疹疾遂不得尅平適寇于時出軍河外直爲撫背未扼其喉然晉州本高歡所起統攝要重今

往攻之彼必來援嚴軍以待擊之必尅然後乘破竹之勢鼓行而東足以窮其窟穴諸將多不願行帝曰機者事之微不可失矣沮軍事者以軍法裁之已酉帝總戎東伐以越王盛爲右一軍總管杞公亮爲右二軍總管隋公楊堅爲右三軍總管譙王儉爲左一軍總管大將軍竇泰爲左二軍總管廣化公丘崇爲左三軍總管齊王憲陳王純爲前軍癸亥帝至晉州遣齊王憲帥精騎二萬守雀鼠谷陳王純步騎二萬守千里徑鄭公達奚震步騎一萬守統軍川大將軍韓明步兵五千守齊子嶺烏氏公尹升步騎五千守鼓鍾鎮涼城公辛韶步騎五千守蒲津關柱國趙王招步騎一萬自華谷攻汾州諸城柱國宇文盛步兵一萬守汾水關遣內史王誼監六軍攻晉州城帝屯於汾曲齊王憲攻洪洞永安二城竝拔之是夜虹見於晉州城上首向南尾入紫宮帝每日自汾曲赴城

下親督戰庚午齊行臺左丞侯子欽出降壬申齊晉州刺史崔嵩夜密使送款上開府王軌應之未明登城遂尅晉州甲戌以上開府梁士彥爲晉州刺史以鎮之十一月己卯齊主自并州帥衆來援帝以其兵新集且避之乃詔諸軍班師齊王遂圍晉州齊王憲屯諸軍於涑水爲晉州聲援河東地震癸巳至自東伐獻俘于太廟景申放齊諸城鎮降人還丁酉帝發京師壬寅度河與諸軍合十二月戊申次晉州庚戌帝帥諸軍八萬置陣東西二十餘里乘常御馬從數人巡陣所至輒呼主帥姓名以慰勉之將士感見知之恩各思自厲將戰有司請換馬帝曰朕獨乘良馬何所之齊主亦於灤北列陣申後齊人填灤南引帝大喜勒諸軍擊之齊人便退齊主與其麾下數十騎走還并州齊衆大潰軍資甲仗數百呈間委棄山積辛亥帝幸晉州仍率諸軍追齊主諸將固請還師帝

曰縱敵患生卿等若疑朕將獨往諸將不敢言甲寅齊王遣其丞相高阿那肱守高壁帝麾軍直進那肱望風退散景辰師次介休齊將韓建業舉城降以爲上柱國封郟國公丁巳大軍次并州齊王留其從兄安德王延宗守并州自將輕騎走鄴是日詔齊王公以下示以逆順之道於是齊將帥降者相繼戊午高延宗僭卽僞位改年曰德昌己卯軍次并州帝帥諸軍合戰齊人退帝逐北及城東門諸軍遶城置陣至夜延宗帥其衆排陣而前城中軍却人相蹂踐大爲延宗所敗齊人欲閉門以圍下積尸靡不得闔帝從數騎崎嶇危險僅得出門至明帥諸軍更戰大破之禽延宗并州平壬戌詔曰昔天厭水運龍戰於野兩京否隔四紀于茲朕垂拱巖廊君臨宇縣相邠人於海內混楚弓於天下一物失所有若推溝方欲德綏未服義征不誨僞主高緯放命燕齊怠慢典刑俶擾

天紀加以背惠怒隣棄信忘義朕應天從物伐罪弔人一鼓而蕩平陽再舉而摧強敵僞署王公相繼道左高緯智窮數屈逃竄艸間僞安德王高延宗擾攘之間遂竊名號與僞齊昌王莫多婁敬顯等收合餘燼背城借一王威旣震魚潰鳥離破竹更難建瓴非易延宗衆散衿甲軍門根本旣傾枝葉自霄幽青海岱折簡而來莫北河南傳檄可定八紘共貫六合同風方當偃伯靈臺休牛桃塞無疆之慶非獨在予漢皇約法除其苛政姬王輕典刑彼新邦思覃惠澤被之率土新集臣庶皆從蕩滌可大赦天下高緯及王公以下若釋然歸順咸許自新諸亡入僞朝亦從寬宥官榮次序依例無失齊制僞令卽宜削除鄒魯縉紳幽并騎士一介可稱竝宜銓錄景寅出齊宮中金銀寶器珠玉麗服及宮女二千人班賜將士以柱國趙王招陳王純越王盛杞公亮梁公侯莫陳芮庸公

王謙北平公寇紹鄭公達奚震竝爲上柱國封齊王憲子安城郡公質爲河間王諸有功者封授各有差癸酉帝帥六軍趣鄴六年春正月乙亥齊主傳位于其太子恒改年曰承光自號太上皇壬辰帝至鄴癸巳帥諸軍圍之齊人拒守諸軍奮擊大破之遂平齊王先送其母及妻子于青州及城陷帥數十騎走青州遣大將軍尉勤追之是戰也於陣獲其齊昌王莫多婁敬顯帝數之曰汝有死罪三前從并州走鄴棄母攜妻妾是不孝外爲僞主勦力內實通啓於朕是不忠送款之後猶持兩端是不信如此用懷不死何待遂斬之是日西方有聲如雷甲子帝入鄴城詔去年大赦班宣未及之處皆從赦例己亥詔曰晉州大陣至鄴身殞戰場者其子卽授父本官尉勤禽齊王及其太子恒於青州庚子詔曰僞齊之末姦佞擅權濫罰淫刑動挂羅網僞右丞相咸陽王故斛律

明月僞侍中特進開府故崔季舒等七人或功高獲罪或直言見誅朕兵以義動翦除凶暴表閭封墓事切下車宜追贈諡并加寔措其見在子孫各隨蔭敘錄家口田宅沒官者并還之辛丑詔僞齊東山南園及三臺竝毀撤瓦木諸物凡入用者盡賜百姓山園之田各還本主二月景午論定諸軍勳置酒于齊太極殿會軍士以上班賜有差丁未齊主至帝降自阼階見以賓主禮齊任城王潛在冀州擁兵未下遣上柱國齊王憲與柱國隋公楊堅討平之齊范陽王高紹義叛入突厥齊諸行臺州鎮悉降關東平合州五十五郡一百六十二縣三百八十五戶三十萬二千五百八十八口二千萬六千八百八十六乃於河陽及幽青南兗豫徐北朔定州置總管府相并二總管各置官及六府官癸丑詔自僞武平三年以來河南諸州人僞齊破掠爲奴婢者不問公私竝放免之其

住在淮南者亦卽聽還願住淮北者可隨便安置癘疾孤老不能
自存者所在矜恤乙卯車駕發自鄴三月壬午詔山東諸州各舉
士夏四月乙巳至自東伐列齊王於前其王公等竝從車輿旌旗
及器物以次陳于其後大駕布六軍備凱樂獻俘於太廟京邑觀
者皆稱萬歲戊申封齊王爲溫國公庚戌大會群臣及諸蕃客于
路寢乙卯廢蒲陝涇寧四州總管己巳享太廟詔分遣使人巡方
撫慰觀風省俗五月丁丑以柱國譙王儉爲大冢宰庚辰以上柱
國杞公亮爲大司徒鄭公達奚震爲大宗伯梁公侯莫陳丙爲大
司馬柱國應公獨孤永業爲大司寇鄭公韋孝寬爲大司空辛巳
大醮于正武殿以報功己丑祀方丘詔曰往者冢臣專任制度有
違正殿別寢事窮壯麗非直彫墻峻宇深戒前王而締構弘敞有
踰清廟不軌不物何以示後兼東夏初平人未見德率先海內宜

自朕始其路寢會義崇信含仁雲和思齊諸殿等農隙之時悉可
毀撤彫斷之物竝賜貧人繕造之宜務從卑朴戊戌詔曰京師宮
殿已從撤毀并鄴二所華侈過度誠復作之非我豈容因而弗革
諸堂殿壯麗竝宜除蕩蕩宇雜物分賜窮人三農之隙別漸營構
止蔽風雨務在卑狹庚子陳人來聘是月青城門無故自崩六月
辛亥御正武殿錄囚徒甲子東巡丁卯詔曰自今不得娶母同姓
以爲妻妾秋七月景戌行幸洛州己丑詔山東諸州舉有才望者
赴行在所共論政事得失八月壬寅議權衡度量頒於天下其不
依新式者悉追停之詔曰以刑止刑以輕代重罪不及嗣皆有定
科雜役之徒獨異常憲一從罪配百代不免罰旣無窮刑何以措
凡諸雜戶悉放爲百姓配雜之科因之永削甲子鄭州獻九尾狐
皮肉銷盡骨體猶具帝曰瑞應之來必昭有德若使五品時序四

海和平家識孝慈乃能致此今無其時恐非實錄乃令焚之九月
壬申以柱國鄭公竇熾申公李穆爲上柱國戊寅初令庶人以上
非朝祭之服唯得衣綢綿綢絲布圓綾紗絹綃葛布等九種壬辰
詔東土諸州儒生明一經以上竝舉送州郡以禮發遣冬十月戊
申行幸鄴宮戊午改葬德皇帝於冀州帝服總哭于太極殿百官
素服哭是月誅溫公高緯十一月壬申封皇子充爲道王兌爲蔡
王癸酉陳將吳明徹侵呂梁徐州總管梁士彥與戰不利退守徐
州遣上大將軍郟公王軌討之是月稽胡反遣齊王憲討平之詔
自永熙三年七月以來十月以前東土人被鈔在化內爲奴婢者
及平江陵日良人沒爲奴婢者竝免同人伍詔曰正位于中有聖
通典質文相革損益不同五帝則四星之象三王制六宮之數劉
曹已降等列彌繁選擇徧于生靈命秩方于庶職椒房丹地有衆

如雲本由嗜欲之情非關風化之義朕運當澆季思復古始弘贊
後庭事從簡約可置妃二人世婦三人御妻三人自茲以外宜悉
減省己亥晦日有蝕之初行刑書要制持杖群強盜一疋以上不
持杖群強盜五疋以上監臨主掌自盜二十疋以上小盜及詐請
官物三十疋以上正長隱五戶及十丁以上隱地三頃以上皆至
死刑書所不載者自依律科十二月北營州刺史高寶寧據州反
庚申行幸并州宮移并州軍人四萬戶於關中戊辰廢并州宮及
六府是歲吐谷渾百濟竝遣使朝貢

宣政元年春正月癸酉吐谷渾僞趙王他婁屯來降壬午行幸鄴
宮辛卯幸懷州癸巳幸洛州詔於懷州置宮二月甲辰柱國大冢
宰譙王儉薨丁巳車駕至自東巡乙丑以上柱國越王盛爲大冢
宰陳王純爲雍州牧三月戊辰於蒲州置宮廢同州及長春二宮

壬申突厥遣使朝貢甲戌初服常冠以皂紗爲之加簪而不施纓導其制若今之折角巾也上大將軍王軌破陳師于呂梁禽其將吳明徹等俘斬三萬餘人丁亥詔柱國豆盧寧征江南武陵南平等郡所有士庶爲人奴婢者悉依江陵放免壬辰改元夏四月壬子初令遭父母喪者聽終制庚申突厥入寇幽州五月己丑帝總戎北伐遣柱國原公姬願東平公宇文神舉等五道俱入發關中公私馬驢悉從軍癸巳帝不豫止于雲陽宮景申詔停諸軍六月丁酉帝疾甚還京其夜崩於乘輿時年三十六遺詔曰人肖形天地稟質五常修短之期莫非命也朕君臨宇縣十有九年未能使百姓安樂刑措不用未旦求衣分宵忘寢昔魏室將季海內分崩太祖扶危翼傾肇開王業燕趙榛蕪又竊名號朕上述先志下順人心遂與王公將帥共平東夏雖復祇氛蕩定而人勞未康每一

念如此若臨冰谷將欲包舉六合混同文軌今遘疾大漸力氣稍微有志不申以此歎息天下事重萬機不易王公以下爰及庶寮宜輔導太子副朕遺意令上不負太祖下無失爲臣朕雖瞑目九泉無所復恨朕平生居處每存菲薄非直以訓子孫亦乃本心所好喪事資用須使儉而合禮墓而不墳自古通典隨吉卽葬葬訖公除四方士庶各三日哭妃嬪以下無子者悉放還家謚曰武皇帝廟稱高祖己未葬于孝陵帝沉毅有智謀初以晉公護專權常自晦迹人莫測其深淺及誅護之後始親萬機尅已勵精聽覽不怠用法嚴整多所罪殺號令懇惻唯屬意於政群下畏服莫不肅然性旣明察少於恩惠凡布懷立行皆欲踰越古人身衣布袍寢布被無金寶之飾諸宮殿華綺者皆撤毀之改爲土階數尺不施櫺栢其彫文刻鏤錦繡纂組一皆禁斷後宮嬪御不過十餘人勞

謙接下自強不息以海內未康銳情教習至於校兵閱武步行山谷履涉勤苦皆人所不堪平齊之役見軍士有跣行者帝親脫靴以賜之每宴會將士必自執盃勸酒或手付賜物至於征伐之處躬在行陣性又果決能斷大事故能得士卒死力以弱制強破齊之後遂欲窮兵極武平突厥定江南一二年間必使天下一統此其志也

宣皇帝諱贇字乾伯武帝長子也母曰李太后武成元年生于同州保定元年五月景午封魯國公建德元年四月癸巳武帝親告廟冠於阼階立爲皇太子二年詔皇太子巡撫西土文宣后崩武帝諒闇詔太子總朝政五旬而罷武帝每巡幸四方太子常留監國五年二月又詔太子巡西土因討吐谷渾宣政元年六月丁酉武帝崩戊戌太子卽皇帝位尊皇后曰皇太后甲子誅上柱國齊

王憲閏月乙亥詔山東流人新後業及突厥侵掠家口破亡不能存濟者給復一年立妃楊氏爲皇后辛巳以上柱國趙王招爲太師陳王純爲太傅柱國代王達滕王迥盧公尉遲運薛公長孫覽竝爲上柱國是月幽州盧昌期據范陽反詔柱國東平公宇文神舉討平之秋七月乙巳享太廟景午祀圓丘戊申祀方澤庚戌以小宗伯岐公斛斯徵爲大宗伯壬戌以南兗州總管隋公楊堅爲上柱國大司馬癸亥尊所生李氏爲帝太后八月景寅夕月於西郊長安萬年二縣人居京城者給復三年壬申幸同州遣大使巡察諸州制九條宣下州郡其母族絕服外者聽婚以上柱國薛公長孫覽爲大司徒柱國楊公王誼爲大司空景戌以柱國永昌公椿爲大司寇九月丁酉以柱國宇文盛張掖公王傑枹罕公辛威鄖國公韋季寬竝爲上柱國庚戌封皇弟元爲荆王詔諸應拜者

皆以三拜成禮冬十月癸酉至自同州戊子百濟遣使朝貢十一月己亥講武于道會苑帝親擐甲是月突厥犯邊圍酒泉殺掠吏士十二月甲子以柱國畢王賢爲大司空己丑以上柱國河陽總管滕王道爲行軍元帥伐陳免京師見徒竝令從軍

大象元年春正月己丑受朝于路門帝服通天冠絳紗袍群臣皆服漢魏衣冠大赦改元爲大成初置四輔官以大冢宰越王盛爲大前疑蜀公尉遲迴爲大右弼申公李穆爲大左輔大司馬隋公楊堅爲大後丞癸卯封皇子衍爲魯王甲辰東巡景午以柱國常山公于翼爲大司徒辛亥以柱國許公宇文善爲大宗伯戊午行幸洛陽立魯王衍爲皇太子二月癸亥詔曰河洛之地舊稱朝市自魏氏失馭城闕爲墟我太祖受命鄴鎬有懷光宅高祖往巡東夏布政此宮朕以眇身祇承寶運雖庶幾幸修之志敢忘燕翼之

心一昨駐蹕金墉備嘗遊覽百王制度基址尚存今若因循爲功易立宜命邦事修復舊都奢儉取文質之間功役依子來之義北瞻河內咫尺非遙前詔經營今宜停罷於是發山東諸州兵增一月功爲四十五日役起洛陽宮常役四萬人以迄晏駕并移相州六府於洛陽稱東京六府殺柱國徐州總管郟公王軌停南討諸軍以趙王招女爲千金公主嫁於突厥乙亥行幸鄴景子初令總管刺史行兵者加持節餘悉罷之辛巳詔傳位于皇太子衍大赦改元大成爲大象帝於是自稱天元皇帝所居稱天臺冕二十有四旒車服旗鼓皆以二十四爲節內史御正皆置上大夫皇帝衍稱正陽宮置納言御正諸衛等官皆準天臺尊皇太后爲天元皇太后癸未日出將入時其中竝有烏色大如雞卵經四日乃滅戊子以大前疑越王盛爲太傅大右弼蜀公尉迴爲大前疑代王達

爲大右弼辛卯詔徙鄴城石經于洛陽又詔洛陽凡是元遷戶竝聽還洛州此外欲往者聽之河陽幽相豫毫青徐七總管受東京六府處分三月庚申車駕至自東巡大陳軍伍親擐甲胄入自青門皇帝衍備法駕從百官迎於青門外是時驟雨儀衛失容辛酉封趙王招第二子貫爲永康縣王夏四月壬戌朔有司奏言日蝕不視事過時不蝕乃臨軒立妃朱氏爲天元帝后癸亥以柱國畢王賢爲上柱國己巳享太廟壬午大醮于正武殿五月辛亥以洛州襄國郡爲趙國齊州濟南郡爲陳國豐州武當安富二郡爲越國潞州上黨郡爲代國荊州新野郡爲滕國邑各一萬戶令趙王招陳王純越王盛代王達滕王迥竝之國是月遣使簡視京城及諸州士庶女充選後宮突厥寇并州六月咸陽有池水變爲血徵山東諸州人修長城秋七月庚寅以大司空畢王賢爲雍州牧大

後承隋公楊堅爲大前疑柱國榮陽公司馬洸難爲大後承景申納大後承司馬洸難女爲正陽宮皇后己酉尊帝太后李氏爲天皇太后壬子改天元帝后朱氏爲天皇后立妃元氏爲天右皇后妃陳氏爲天左皇后八月庚申幸同州壬申還宮甲戌以天左皇后父大將軍陳山提天右皇后父開府元晟竝爲上柱國初武帝作刑書要制用法嚴重及帝卽位恐物情未附除之至是爲刑經聖制其法深刻大醮于正武殿告天而行焉壬午以上柱國雍州牧畢王賢爲太師上柱國郇公韓建業爲大左輔是月所在螿群鬪各四五尺死者十八九九月己卯以鄴王貞爲大冢宰上柱國鄖公韋孝寬爲行軍元帥率行軍總軍杞公亮郟公梁士彥伐陳遣御正杜果使於陳冬十月壬戌幸道會苑大醮以高祖武皇帝配醮初復佛象及天尊象帝與二象俱南坐大陳雜戲令京城士

庶縱觀是月相州人段德舉謀反伏誅十一月乙未夜行幸同州
壬寅還宮乙巳初鑄永通萬國錢以一當千與五行大布並行是
月韋孝寬拔壽陽杞國公亮拔黃城梁士彥拔廣陵陳人退走於
是江北盡平十二月戊午以災異屢見帝御路寢見百官詔曰朕
以寡德君臨區寓始於秋季及此玄冬幽憂殷勤屢貽深戒至有
金入南斗木犯軒轅熒惑干房又與土合流星照夜東南而下然
則南斗主於爵祿軒轅爲於後宮房曰明堂布政所也火土則憂
孽之兆流星乃兵凶之驗豈其宮人失序女謁尚行政事乖方憂
患將至何其昭著若斯之甚將避正寢齋居克念惡衣減膳去飾
徹懸披不諱之誠開直言之路欲使刑不濫及賞弗踰等選舉以
才宮闈修德宜宣諸內外庶盡弼諧允叶人心用消天譴於是舍
仗衛住天興宮百官上表勸復寢膳許之甲子還宮御正武殿集

百官及宮人內外命婦大列妓樂又縱胡人乞寒用水澆沃以爲
戲樂乙丑行幸洛陽帝親御驛馬日行三百里四皇后及文武侍
衛數百人並乘驛以從令四后方駕齊驅或有先後便加譴責人
馬頓仆相屬於道己卯還宮

二年春正月丁亥帝受朝于道會苑癸巳享太廟乙巳造二辰畫
日月象以置左右戊申雨雪雪止又雨細黃土移時乃息乙卯詔
江右諸州新附人給復二十年初稅入市者人一錢二月丁巳帝
幸路門學行釋奠禮戊午突厥遣使獻方物且逆千金公主乙丑
改制詔爲天制敕爲天敕尊天元皇太后爲天元上皇太后天皇
太后李氏曰天元聖皇太后癸未立天元皇后楊氏爲天元大皇
后天皇后朱氏爲天大皇后天右皇后元氏爲天右大皇后天左
皇后陳氏爲天左大皇后正陽宮皇后直稱皇后是月洛陽有禿

鷲鳥集新太極殿前榮川有黑龍見與赤龍鬪于汴水側黑龍死
三月丁亥賜百官及百姓大酺詔進封孔子爲鄒國公邑數準舊
并立後承襲別於京師置廟以時祭奠戊子行軍總管杞公亮舉
兵反行軍元帥韋季寬獲而殺之辛卯行幸同州增候正前驅式
道爲三百六十重自應門至赤岸澤數十里間幡旗相蔽鼓樂俱
作又令武賁持鉞馬上稱警蹕以至同州乙未改同州宮爲天成
宮庚子車駕至自同州詔天臺侍衛皆著五色及紅紫綠衣以雜
色緣名曰品色衣有大事與公服閒服之壬寅詔內外命婦皆執
笏其拜宗廟及天臺皆俛伏甲辰初置天中大皇后立天左大皇
后陳氏爲天中大皇后立妃尉遲氏爲天左大皇后夏四月己巳
享太廟己卯以旱故降見囚死罪己下壬午幸中山祈雨至咸陽
宮雨降甲申還宮令京城士女于衢巷作音樂以迎候五月甲午

帝備法駕幸天興宮乙未帝不愈還宮詔楊州總管隋公楊堅入
侍疾丁未追趙越陳代滕五王入朝己酉大漸御正下大夫劉昉
與內史上大夫鄭譯矯制以隋公楊堅受遺輔政是日帝崩于天
德殿時年二十二謚宣皇帝七月景申葬定陵帝之在東宮也武
帝慮其不堪承嗣遇之甚嚴朝見進止與諸臣無異雖隆寒盛暑
亦不得休息性嗜酒武帝遂禁醪醴不許至東宮帝每有過輒加
捶扑嘗謂之曰古來太子被廢者幾人餘兒豈不堪立邪於是遣
東宮官屬錄帝言語動作每月奏聞帝懼威嚴矯情修飾以是惡
不外聞嗣位之初方逞其欲大行在殯曾無戚容卽通亂先帝宮
人纔踰年便恣聲樂采擇天下子女以充後宮好自矜夸飾非拒
諫禪位之後彌復僣奢耽酗於後宮或旬日不出公卿近臣請事
者皆附闈官奏之所居宮殿帷帳皆飾以金玉珠寶光華炫耀極

麗窮奢及營洛陽宮雖未成畢其規摹壯麗踰于漢魏遠矣唯自尊崇無所顧憚國典朝儀率情變改後宮位號莫能詳錄每對臣下自稱爲天以五色土塗所御天德殿各隨方色又於後宮與皇后等列坐用宗廟禮器罇彝珪瓚之屬以次食焉及令群臣朝天臺者致齋二日清身一日車旗章服倍於前王之數旣自比上帝不欲令人同已常自帶綬及冠通天冠加金附蟬顧見侍臣武弁上有金蟬及王公有綬者竝令去之又不聽人有高者大者之稱諸姓高者改爲姜九族稱高祖者爲長祖曾爲次長祖官稱名位凡謂上及大者改爲長有天者亦改之又令天下車皆渾成爲輪禁天下婦人皆不得施粉黛唯宮人得乘有輻車加粉黛焉西陽公溫杞公亮之子卽帝從祖兄其妻尉遲氏有容色因入朝帝遂飲以酒逼而姪之亮聞之懼謀反纔誅溫卽追尉遲氏入宮初爲

妃尋立爲皇后每左右侍臣論議唯欲興造革易未嘗言及政事其後遊戲無恒出入不節羽儀仗衛晨出夜還或幸天興宮或遊道會苑陪侍之官皆不堪命散樂雜戲魚龍爛漫之伎常在目前好令京城少年爲婦人服飾入殿歌舞與後宮觀之以爲喜樂擯斥近臣多所猜怨又吝於財略無賜與恐群臣規諫不得行已之志嘗遣左右密伺察之動止所爲莫不抄錄小有乖違輒加其罪自公卿以下皆被楚撻其問誅戮黜免者不可勝言每擢人皆以百二十爲度名曰天杖宮人內職亦如之后妃嬪御雖被寵嬖亦多被杖背於是內外恐懼人不自安皆求苟免莫有固志重足累息以逮于終矣

靜皇帝諱衍後改名闡宣帝之長子也母曰朱皇后建德二年六月生于東宮大象元年正月癸卯封魯王戊午立爲皇太子二月

辛巳宣帝於鄴宮傳位授帝居正陽宮二年五月乙未宣帝寢疾
詔帝入宿路門學巳酉宣帝崩帝入居天臺廢正陽宮大赦停洛
陽宮作庚戌上天元上皇太后尊號爲太皇太后天元聖皇太后
李氏爲大帝太后天元太皇后爲皇太后天太皇后朱氏爲帝太
后其天中大皇后陳氏天右大皇后元氏天左大皇后尉遲氏竝
出俗爲尼以柱國漢王贊爲上柱國右大丞相上柱國楊州總管
隋公楊堅爲假黃鉞左大丞相柱國秦王贊爲上柱國帝居諒闇
百官總巳以聽於左大丞相壬子以上柱國鄖公韋季寬爲相州
總管罷入市稅錢六月戊午以柱國許公宇文善神武公竇毅修
武公侯莫陳瓊大安公閻慶竝爲上柱國趙王招陳王純越王盛
代王達滕王迥來朝庚申復佛道二教辛酉以柱國杞公贊燕公
于寔郃公賀拔伏恩竝爲上柱國甲子相州總管尉遲迴舉兵不

受代詔發關中兵卽以韋季寬爲行軍元帥討之柱國畢王賢以
謀執政被誅以上柱國秦王贊爲大冢宰杞公椿爲大司徒巳巳
詔南定北光衡巴四州人爲宇文亮抑爲奴婢者竝免之甲戌有
赤氣起西方漸東行徧天庚辰罷諸魚池及山澤公禁者與百姓
共之以柱國蔣公梁睿爲益州總管秋七月甲申突厥送齊范陽
王高紹義庚寅申州刺史李惠起兵庚子詔趙陳越代滕五王入
朝不趨劔履上殿榮州刺史邵公宇文冑舉兵遣大將軍楊素討
之青州總管尉遲綱舉兵丁未隋公楊堅都督內外諸軍事巳酉
鄖州總管司馬消難舉兵以柱國楊公王誼爲行軍元帥討之壬
子趙王招越王盛以謀執政被誅癸丑封皇弟衍爲萊王術爲郢
王是月豫州襄州總管諸蠻各率種落反八月庚申益州總管王
謙舉兵不受代卽以梁睿爲行軍元帥討之庚午韋季寬破尉迴

於鄴迴自殺相州平移相州於安陽其鄴城及邑毀廢之景子以漢王贇爲太師以上柱國并州總管申公李穆爲太傅以宋王實爲大前疑以秦王贇爲大右弼以燕公于實爲大左輔己卯以尉迴平大赦庚辰司馬消難擁衆以魯山甌山二鎮奔陳遣大將軍元景山追擊之鄆州平沙州氏帥開府楊永安聚衆反應王謙遣大將軍達奚儒討之楊素破宇文冑於滎陽斬之以上柱國神武公竇毅爲大司馬以齊公于智爲大司空廢相青荆金晉梁州六總管九月景戌廢河陽總管爲鎮隸洛州以小宗伯竟陵公楊慧爲大宗伯壬辰廢皇后司馬氏爲庶人戊戌以柱國楊公王誼爲上柱國庚戌以柱國常山公于翼化政公宇文忻竝爲上柱國壬子丞相去左右號隋公楊堅爲大丞相冬十月甲寅日有蝕之壬戌陳王純以怨執政被誅大丞相隋公楊堅加大冢宰五府總于

天官戊寅梁睿破王謙斬之傳首京師益州平十一月甲辰達奚儒破楊永安沙州平丁未上柱國鄆公韋季寬薨十二月壬子以柱國蔣公梁睿爲上柱國丁巳以柱國邗公楊雄普安公賀蘭謩邨公梁士彥上大將軍新寧公叱列長文武鄉公崔弘度大將軍中山公宇文恩濮陽公宇文述渭原公和干子任城公王景漁陽公楊銳上開府廣宗公李崇隴西公李詢竝爲上柱國庚申以柱國楚公豆盧勣爲上柱國癸亥詔曰太祖受命龍德猶潛三分天下志扶魏室多所改作冀允上玄文武群官賜姓者衆本殊國邑實乖胙土不歆非類異骨肉而共蒸嘗不愛其親嗟行路而敘昭穆且神徵革姓本爲曆數有歸天命在人推讓終而弗獲故君臨區宇累世於茲可不仍遵謙挹之旨久行權宜之制諸改姓者悉宜復舊甲子大丞相隋公楊堅進爵爲王以郡爲隋國己巳以柱

國沛公鄭譯爲上柱國辛未代王達滕王迥竝以謀執政被誅壬申以大將軍長寧公楊勇爲上柱國大司馬以小冢宰始平公元季矩爲大司寇

大定元年春正月壬午改元景戌詔戎秩上開府以上職事下大夫以上外官刺史以上各舉賢良二月甲子帝遜位于隋居于別宮隋氏奉帝爲介國公邑萬戶車服禮樂一如周制上書不稱表答表不稱詔有其文事竟不行隋開皇元年五月壬申帝崩時年九歲隋志也謚曰靜皇帝葬恭陵

論曰自東西否隔二國爭強戎馬生郊干戈日用兵連禍結力敵勢均疆場之事一彼一此武皇繼業未親萬機慮遠謀深以蒙養正及英威電發朝政惟新內難旣除外略方始乃苦心焦思克已勵精勞役爲士卒之先居處同匹夫之儉修富國之政務強兵之

將乘讎人之有釁順天道而推亡數年之間大勳斯集據祖宗之宿憤拯東夏之阡危盛矣哉有成功者也若使翌日之瘳無爽經營之志獲申黷武窮兵雖見譏於良史雄圖遠略足方駕於前王而識嗣子之非才顧宗祫之至重滯愛同於晉武則哲異於宋宣但欲威之覆楚期於懲肅義方之款豈若是乎卒使昏虐君臨姦回肆毒迹宣后之行事身歿已爲幸矣靜帝越自幼沖紹茲衰統內挾有劉之詐戚藩無齊代之強隋氏因之遂遷龜鼎雖復岷峨投袂翻成凌奪之威漳滏勤王無救宗周之殞嗚呼以文皇之經啓鴻基武皇之克隆景業未踰二紀不祀忽諸斯蓋先帝之餘殃非孺子之罪戾也

北史卷十 周本紀下第十終

西川中鳳圖
氏圖

北史卷十一

隋本紀上第十一

西川中鳳圖
氏圖

隋高祖文皇帝姓楊氏諱堅小名那羅延本弘農華陰人漢太尉震之十四世孫也震八世孫燕北平太守鉉鉉子元壽魏初為武川鎮司馬因家於神武樹頽焉元壽生太原太守惠嘏嘏生平原太守烈烈生寧遠將軍禎禎生皇考忠初禎屬魏末喪亂避地中山結義徒以討鮮于脩禮遂死之周保定中皇考著勳追贈柱國大將軍少保興城郡公皇考美鬚髯身長七尺八寸狀貌瓌偉武藝絕倫識量深重有將率之略年十八客游泰山會梁兵陷郡國沒江南及北海王元顥入洛乃與俱歸顥敗爾朱度律召為帳下統軍後從獨孤信屢有軍功又與信從魏孝武西遷東魏荊州刺史辛纂據穰城皇考從信討之與都督康洛兒元長生乘城而入

及古周

彎弓大呼斬纂以徇城中懾服居半歲以東魏之逼與信俱歸周文帝召居帳下嘗從周文狩于龍門皇考獨當一猛獸左挾其腰右拔其舌周文壯之北臺謂猛獸為拵于因以字之從禽竇泰破沙苑陣封襄武縣公河橋之役皇考與壯士五人力戰守橋敵人不敢進又與李遠破黑水稽胡并與怡峰解玉壁圍以功歷雲洛二州刺史芒山之戰先登陷陣除大都督及侯景度江梁氏喪敗周文將經略乃授皇考都督荆等十五州諸軍事鎮穰城梁雍州刺史岳陽王蕭譽雖曰稱藩而猶懷二心皇考自樊城觀兵漢濱易旗遞進實二千騎登樓望之以爲三萬懼而服焉又攻梁隨郡剋之獲其守桓和所過城戍望風請服進圍安陸梁司州刺史柳仲禮恐安陸不守馳歸赴援諸將恐仲禮至則安陸難下請急攻之皇考曰仲禮已在近路吾以奇兵襲之一舉必剋則安陸不

攻自拔諸城可傳檄而定於是選騎二千銜枚夜進遇仲禮於滌頭禽之悉俘其衆安陸竟陵竝降梁元帝大懼送子方略爲質并送載書請魏以石城爲限梁以安陸爲界皇考乃旋師進爵陳留郡公位大將軍十七年梁元帝逼其兄邵陵王綸送質於齊欲來寇梁元帝密報周文遣皇考討之禽綸數其罪殺之初皇考禽柳仲禮遇之甚厚仲禮至京反譖皇考言在軍大取金寶周文以皇考功重不問然皇考悔不殺仲禮故至此殺綸皇考間歲再舉盡定漢東地甚得新附心魏恭帝賜姓普六茹氏行同州事及于謹伐江陵皇考爲前軍屯江津遏其走路梁人束刃於象鼻以戰皇考射之二象反走江陵平周文立蕭譽爲梁主令皇考鎮穰城周季閔踐祚入爲小宗伯及司馬消難請降皇考與柱國達奚武援之入齊境五百里前後遣三使報消難皆不反命及去北豫州三

十里武疑有變欲還皇考曰有進死無退生獨以千騎夜趣城下
候門開而入乃馳遣召武時齊鎮城伏敬遠勒甲士三千據東陴
舉烽嚴警武憚之不欲係城乃多取財寶以消難先歸皇考以三
千騎殿到洛南皆解鞍而臥齊衆來追至於洛北皇考謂將士曰
但飽食今在死地賊必不敢度水食畢齊兵陽若度水皇考馳將
擊之齊兵不敢逼遂徐引而還武歎曰達奚武自言是天下健兒
今日服矣進位柱國大將軍武成元年進封隋國公邑萬戶別食
竟陵縣一千戶收其租賦保定二年爲大司空時朝議與突厥伐
齊公卿咸以齊兵強國富斛律明月不易可當兵非十萬衆不可
皇考獨曰萬騎足矣明月豎子亦何能爲三年乃以皇考爲元帥
大將軍楊纂李穆王傑爾朱敏及開府元壽田弘慕容近等皆隸
焉又令達奚武帥步騎三萬自南道進期會晉陽皇考乃留敏據

什賁游兵河上皇考出武川過故宅祭先人饗將士席卷二十餘
城齊人守陘嶺之隘皇考縱奇兵大破之留楊纂屯靈丘爲後拒
突厥木杆可汗控地頭可汗步離可汗等以十萬騎來會

四年正月朔攻晉陽時大雪風寒齊人乃悉其精銳鼓譟而出突
厥引上西山不肯戰衆失色皇考乃率七百人步戰死者十四五
以武後期乃班師齊人亦不敢逼突厥乃縱兵大掠自晉陽至平
城七百餘里人畜無遺周武帝拜皇考爲太傅晉公護以其不附
已以爲涇州總管是歲大軍又東伐晉公護出洛陽令皇考出沃
野以應接突厥時軍糧少諸將憂之皇考曰當獲以濟事耳乃招
誘稽胡首領咸令在坐使王傑盛軍容鳴鼓而出皇考陽怪問之
傑曰大冢宰已至洛陽天子聞銀夏間胡擾動故使傑就攻除之
又令突厥使者馳告曰可汗更入并州留兵馬十萬在長城下故

令問公若有稽胡不服欲來共破之坐者皆懼皇考慰喻遣之於是歸命饋輸填積屬晉公護先退皇考亦罷兵而還鎮又以政績稱詔賜錢三十萬布五百匹穀二千斛以疾還京周武及晉公護屢臨視焉薨贈太保都督同朔等十三州軍事同州刺史本官如故謚曰桓公開皇元年追尊爲武元皇帝廟號太祖帝武元皇帝之長子也皇妣曰呂氏以周大統七年六月癸丑夜生帝於馮翊波若寺有紫氣充庭時有尼來自河東謂皇妣曰此兒所從來甚異不可於俗間處之乃將帝舍於別館躬自撫養皇妣抱帝忽見頭上出角徧體起鱗墜帝于地尼自外見曰已驚我兒致令晚得天下帝龍額額上有玉柱入頂目光外射有文在手曰王字長上短下沈深嚴重初入太學雖至親昵不敢狎也年十四京兆尹薛善辟爲功曹十五以皇考勳授散騎常侍車騎大將軍儀同三司

封成紀縣公十六遷驃騎大將軍加開府周文帝見而歎曰此兒風骨非世間人明帝卽位授右小宗伯進封大興郡公明帝嘗遣善相者來和視帝和詭對曰不過柱國旣而私謂帝曰公當爲天下君必大誅殺而後定周武帝卽位遷小宗伯出爲隨州刺史進位大將軍後徵還遇皇妣寢疾三年晝夜不離左右以純孝稱宇文護執政尤忌帝屢將害焉賴大將軍侯伏侯壽等救護以免後襲爵隋國公周武旣爲皇太子娉帝長女爲妃益加禮重齊王憲言於周武曰普六茹堅相貌臣每見之不覺自失恐非人下請早除之周武曰此止可爲將耳內史王軌驟諫曰皇太子非社稷主普六茹堅有反相周武不悅曰必天命將若之何帝甚懼深自晦匿後從周武平齊進柱國又與齊王憲破齊任城王潛於冀州除定州總管先是州城門久閉不行齊人白文宣時或請開之文宣

不許曰當有聖人啓之及帝至而開之莫不驚異遷亳州總管周宣帝卽位以后父徵拜上柱國大司馬大象初遷大後丞右司武俄轉大前疑周宣每巡幸恒委以居守時周宣爲刑經聖制其法深刻帝以法令滋章非興化之道切諫不納帝位望益隆周宣頗以爲忌時周宣四幸女竝爲皇后爭寵相毀周宣每謂后曰必族滅爾家因召帝命左右曰若色動卽殺之帝容色自若遂免大象二年五月以帝爲楊州總管將發暴足疾而止乙未周宣不念時靜帝幼冲前內史上大夫鄭譯御正大夫劉昉以帝皇后之父衆望所集遂矯詔引帝入侍疾因受遺輔政都督內外諸軍事帝恐周武諸王在藩生變稱趙王招將嫁女於突厥爲詞以徵之己酉周宣崩庚戌靜帝詔假黃鉞左大丞相百官總已而聽焉以正陽宮爲丞相府以鄭譯爲長史劉昉爲司馬具置寮佐周宣時刑政

峻酷者悉更以寬大之制天下歸心矣六月趙王招陳王純越王達代王盛滕王迥竝至長安相州總管尉遲迥自以宿將至是不能平遂舉兵趙魏之士響應旬日間衆至十餘萬宇文胄以滎州石繇以建州席毗以沛郡毗弟又羅以兗州皆應迥遣子質于陳以求援帝命上柱國鄖公韋孝寬討之雍州牧畢王賢及趙陳等五王謀作亂帝執賢斬之而掩趙王等罪因詔五王劔履上殿入朝不趨以安之時五王陰謀滋甚帝以酒肴造趙王觀其指趙王伏甲於臥內帝賴元胄以免於是誅趙越二王八月庚午韋孝寬破尉遲迥斬之傳首闕下餘黨悉平初迥之亂鄖州總管司馬洸難據州應迥淮南州縣多從之襄州總管王誼討之洸難奔陳荆郢群蠻乘釁而起命亳州總管賀若誼討平之先是上柱國王謙爲益州總管亦擁衆巴蜀以匡復爲辭帝以東夏山南爲事未遑

致討謙遂屯劔口陷始州至是乃命上柱國梁睿討平之傳首闕下隳劔閣之險以絕好亂之萌焉九月壬子周帝進帝大丞相冬十月周帝詔追贈皇曾祖烈爲柱國太保都督十州諸軍事徐州刺史隋國公諡曰獻皇考忠爲上柱國太師大冢宰都督十三州諸軍事雍州牧壬戌誅陳王純周帝進帝大冢宰五府總于天官十一月辛未誅代王達滕王道十二月甲子周帝授帝相國總百揆去都督內外諸軍事大冢宰之號進爵爲王以隋州之崇業鄖州之安陸城陽溫州之宜人雍州之平靖上明順州之淮南士州之永川昌州之廣昌安昌申州之義陽淮安息州之新蔡建安豫州之汝南臨穎廣寧初安蔡州之蔡陽郢州之漢東二十郡爲隋國劔履上殿入朝不趨贊拜不名備九錫之禮加璽紱遠游冠相國印綠綬綬位在諸侯王上隋國置丞相以下依舊式帝再讓乃

授王爵十郡而已周帝詔進皇祖皇考爵竝爲王夫人爲王妃大定元年二月壬子下令曰以前賜姓皆復其舊甲寅帝受九錫之禮景辰周帝又詔帝冕十有二旒建天子旌旗出警入蹕乘金根車駕六馬備五時副車置旄頭雲空樂舞八佾設鍾簾宮縣王妃爲王后世子爲太子前後三讓乃受俄而下詔依唐虞漢魏故事帝三讓不許乃遣太傅上柱國杞國公椿奉冊曰咨爾相國隋王粵若上古之初爰啓清濁降符授聖爲天下君事上帝而理兆庶和百靈而利萬物非以區寓之富未以宸極爲尊大庭軒轅以前驪連赫胥之日咸以無爲無欲不將不迎遐哉其詳不可聞已厥有載籍遺文可觀聖莫逾于堯美未過于舜堯得太尉已作運衡之篇舜遇司空便敘菁華之竭褰裳脫屣二宮設饗百官歸禹若帝之初斯蓋上則天時不敢不授下祇天命不敢不受湯代於

夏武革於殷干戈揖讓雖復異揆應天順人其道靡異自漢迄晉有魏至周天曆逐獄訟之歸神鼎隨謳歌之去道高者稱帝祿盡者不王與夫文祖神宗無以別也周德將盡禍難頻興宗戚姦回咸將竊發顧瞻宮闕將圖宗社藩維連率逆亂相尋搖蕩三方不合如礪蛇行鳥攫投足無所王受天明命叡德在躬救頽運之艱匡墜地之業援大川之溺救燎原之火除群凶於城社廓被氛於遠服至德合於造化神用洽於天壤八極九野萬方四裔圓首方足莫不樂推往歲長星夜掃經天晝見八風比夏后之作五緯同漢帝之聚除舊之徵昭然在上近者赤雀降祉玄龜効靈鍾石變音蛟魚出穴有新之貺煥焉在下九區歸往百靈協贊人神屬望我不獨知仰祇皇靈俯順人願敬以帝位禪於爾躬天祚告窮天祿永終於戲王其允執厥和儀刑典訓升圓丘而敬蒼昊御皇極而撫黔黎副率土之心恢無疆之祚可不盛歟遣太宗伯大將軍金城公趙爽奉皇帝璽紋百官勸進帝乃受焉

開皇元年春二月甲子自相府常服入宮備禮卽皇帝位於臨光殿設壇於南郊遣兼太傅上柱國鄧公竇熾柴燎告天是日告廟大赦改元京師慶雲見改周官依漢魏之舊制以相國司馬高穎爲尚書左僕射兼納言相國司錄虞慶則爲內史監兼吏部尚書相國內郎李德林爲內史令上開府韋世康爲禮部尚書上開府元暉爲都官尚書開府戶部尚書元巖爲兵部尚書上儀同司宗長孫毗爲工部尚書上儀同司會楊尚希爲度支尚書雍州牧楊惠爲左衛大將軍乙丑追尊皇考爲武元皇帝廟號太祖皇妣呂氏爲元明皇后改周氏左社右廟制爲右社左廟遣八使巡省風俗景寅修廟社立王后獨孤氏爲皇后王太子勇爲皇太子丁卯

以大將軍趙嬰爲尚書右僕射以上開府伊婁彥恭爲右武侯大將軍已巳以五千戶封周帝介國公爲隋室賓旌旗車服禮樂一如其舊上書不爲表答表不稱詔周氏諸王盡降爲公辛未以皇弟同安郡公爽爲雍州牧乙亥封皇弟邵國公慧爲滕王同安公爽爲衛王皇子鴈門公爲晉王俊爲秦王秀爲越王諒爲漢王并州總管李穆爲太師上柱國竇熾爲太傅幽州總管于翼爲太尉觀國公田仁恭爲太子太師武德郡公柳敏爲太子太保丁丑以晉王廣爲并州總管封陳留郡公智積爲蔡王興城郡公靜爲道王戊寅改東京府爲尚書省發官牛五千頭分賜貧人三月宣仁門槐樹連理衆枝內附壬午白狼國獻方物丁亥詔犬馬器翫口味不得獻上戊子弛山澤禁已丑移墊屋連理樹植于宮庭戊戌以太子少保蘇威兼納言吏部尚書庾子詔前代品爵悉依舊定

丁未梁蕭巖使其太宰蕭巖來賀夏四月辛巳大赦戊戌太常散樂並免爲編戶禁雜樂百戲辛丑陳人來聘于周至而上巳受禪致之介國是月發稽胡修築長城二旬而罷五月戊午封邦國公楊雄爲廣平王永康郡公楊弘爲河間王辛未介公薨上舉哀于朝堂諡曰周靜帝六月癸未詔以初受命赤雀降祥推五德相生爲火色其郊及社廟衣服冕之儀而朝會之服旗幟犧牲盡尚赤戎服尚黃秋七月乙卯上始服黃百寮畢賀八月壬午廢東京官甲午遣樂安公元諧擊吐谷渾於青海破而降之九月戊申遣使振給戰亡者家庚午陳將周羅暉攻陷胡墅蕭摩訶寇江北辛未以越王秀爲益州總管改封蜀王壬申以薛公長孫覽宋安公元景山並爲行軍元帥伐陳仍令尚書左僕射高頴節度諸軍是月行五銖錢冬十月乙酉百濟王扶餘昌遣使來賀授昌上開府儀

同三司帶方郡公戊子行新律壬辰行幸岐州十一月乙卯以永
富郡公竇榮定爲右武侯大將軍遣兼散騎侍郎鄭撫使於陳已
已有流星如墜牆光照于地十二月甲申以禮部尚書韋世康爲
吏部尚書庚子至自岐州壬寅高麗王高陽遣使朝貢授陽大將
軍遼東郡公太子太保柳敏卒是歲靺鞨突厥阿波可汗沙鉢略
可汗竝遣使朝貢

二年春正月庚申陳宣帝殂辛酉置河北道行臺尚書省于并州
以晉王廣爲尚書令置河南道行臺尚書省于洛州以秦王俊爲
尚書令置西南道行臺尚書省於益州以蜀王秀爲尚書令戊辰
陳人遣使請和求歸胡墅甲戌詔舉賢良二月己丑詔以陳有喪
命高頴等班師庚寅加晉王廣左武衛大將軍秦王俊右武衛大
將軍庚子京師雨土三月初命入宮殿門通籍戊申開渠引杜陽

水於三時原夏四月丁丑以寧州刺史竇榮定爲左武侯大將軍
庚寅大將軍韓僧壽破突厥於雞頭山上柱國李充破突厥於河
北山五月戊申以上開府長孫平爲度支尚書己酉以旱故上親
省囚徒其日大雨己未高寶寧寇平州突厥入長城庚申以豫州
刺史皇甫績爲都官尚書甲子改傳國璽曰受命璽丁卯制人年
六十以上免課六月壬午以太府卿蘇季慈爲兵部尚書甲申使
使弔於陳乙酉上柱國李充破突厥于馬邑景申詔曰朕祇奉上
玄君臨萬國屬生靈之弊處前代之宮以爲作之者勞居之者逸
改創之事心未遑也而王公大臣陳謀獻策咸云義農以降至於
姬劉有當世而屢遷無革命而不徙曹馬之後時見因循乃末世
之宴安非往聖之宏義此城從漢彫殘日久屢爲戰場舊經喪亂
今之宮室近代權宜又非謀筮從龜瞻星揆日不足建皇王之邑

合大眾所聚論變通之數具幽顯之情同心固請詞情深切然則京師百官之府四海歸向非朕一人之所獨有苟利于物其可違乎且殷之五遷恐人盡怨是則以吉凶之土制長短之命謀新去故如農望秋雖則劬勞其究安宅今區寓寧一陰陽順序安安以遷勿懷胥怨龍首山川原秀麗卉物滋阜卜食相土宜建都邑定鼎之基永固無窮之業在斯公私府宅規模遠近營構資須隨事修葺仍詔左僕射高頴將作大匠劉龍鉅鹿郡公賀婁子幹太府少卿高龍又等創造新都秋七月癸巳詔新置都處墳墓令悉遷葬設祭仍給人功無主者命官爲殯葬甲午行新令冬十月以撤毀故徙居東宮給內外官人祿癸酉皇太子勇屯兵咸陽以備胡虜庚寅上疾愈享百寮于觀德殿賜錢帛皆任自取盡力以出辛卯以營新都副監賀婁子幹爲工部尚書十一月景午初命爲方

陣戰法及制軍營圖樣下諸軍府以擬征突厥十二月辛未上講武于後園甲戌上柱國竇毅卒景子名新都曰大興城乙酉遣彭城公虞慶則屯弘化以備胡突厥寇周槃行軍總軍達奚長儒爲虜所敗景戌賜國子生經明者束帛丁亥親錄囚徒是歲高麗百濟竝遣使朝貢

三年春正月庚子將遷新都大赦禁大刀長稍始令人以二十一成丁歲役功不過二十日不役者收庸廢遠近酒坊罷鹽井禁二月巳巳朔日有蝕之癸酉陳人來聘突厥犯邊癸未以左武衛大將軍李禮成爲右武衛大將軍三月丁未上柱國鮮虞縣公謝慶恩卒景辰以雨故常服入新都京師承明里醴泉出丁巳詔購遺書於天下癸亥城榆關夏四月巳巳衛王爽大破突厥於白道山停築原陽雲內紫河等鎮而還上柱國建平郡公于義卒庚午吐

谷渾寇臨洮洮州刺史皮子信死之壬申以尚書右僕射趙瑳兼
內史令丁丑以滕王瓚爲雍州牧庚辰行軍總管陰壽大破高寶
寧於黃龍甲申以旱故上親祀雨師景戌詔天下勸學行禮巳丑
陳郢州城主張子譏遣使請降上以和好不納辛卯遣兼散騎常
侍薛舒聘於陳癸巳上親雩五月癸卯太尉任城公于翼薨總管
李晃破突厥於摩那渡口乙巳梁太子蕭琮來賀遷都辛酉親祀
方澤壬戌行軍元帥竇榮定破突厥及吐谷渾於涼州赦黃龍死
罪以下六月庚午封衛王爽子集爲遂安郡王戊寅突厥遣使求
和庚辰行軍總管梁遠破吐谷渾於爾汗山斬其名王秋七月壬
戌詔曰往者山泉河表經此妖亂孤城遠守多不自全濟陰太守
杜猷身陷賊徒命懸寇手郡省事范臺攻傾產營護免其戮辱眷
言誠節實有可嘉宜超恒賞用明沮勸臺攻可大都督假湘州刺

史丁卯日有蝕之八月壬午遣尚書右僕射高穎出寧州道吏部
尚書虞慶則出原州道竝爲行軍元帥以擊胡戊子親祀太社九
月壬子幸城東觀穀稼癸丑大赦冬十月甲戌廢河南道行臺省
十一月發使巡省風俗庚辰陳人來聘陳主知帝貌異世人使副
使表彥圖像而去甲午罷天下諸郡十二月乙卯遣兼散騎常侍
唐令則使于陳戊午以刑部尚書蘇威爲戶部尚書是歲高麗突
厥靺鞨竝遣使朝貢

四年春正月甲子朔日有蝕之祀太廟辛未祀南郊壬申梁主蕭
巋來朝甲戌大射於北苑十日而罷壬午齊州水辛卯渝州獲獸
似麋一角同蹄壬辰班新曆二月乙巳上餞梁主于霸上庚戌行
幸隴州突厥可汗阿史那玷厥率其屬來降夏四月巳亥敕總管
刺史父母及子年十五以上不得將之官庚子以吏部尚書虞慶

則爲尚書右僕射瀛州刺史楊尚希爲兵部尚書毛州刺史劉仁
恩爲刑部尚書五月癸酉契丹主莫賀弗遣使請降拜大將軍六
月庚子降囚徒壬子開通濟源自渭達河以通運漕甲寅制官人
非戰功不授上柱國以下戎官以雍同華歧宜五州旱命無出今
年租調戊午秦王俊來朝秋七月景寅陳人來聘八月甲午遣十
使巡省天下戊戌衛王爽來朝壬寅上柱國太傅鄧公竇熾薨乙
卯陳將夏侯苗請降上以通和不納九月己巳上親錄囚徒庚午
契丹內附甲戌以關中饑行幸洛陽冬十一月壬戌遣兼散騎常
侍薛道衡使于陳甲戌改周十二月爲臘蜡是歲鞞鞞及女國竝
遣使朝貢

五年春正月戊辰詔行新禮壬申詔罷江陵總管其後梁主請依
舊許之三月戊午以尚書右僕射高穎爲左領軍大將軍以上柱
國宇文忻爲右領軍大將軍夏四月甲午契丹遣使朝貢壬寅上
柱國王誼謀反誅乙卯詔徵山東大儒馬榮伯等戊申車駕至自
洛陽五月甲申初置義倉梁主蕭歸殂遣上大將軍元契使於突
厥阿波可汗秋七月庚申陳人來聘壬午突厥沙鉢畧可汗上表
稱臣八月甲辰河南諸州水遣戶部尚書蘇威振給之戊申有流
星數百四散而下九月乙丑改鮑陂曰杜陂霸水曰滋水景子遣
兼散騎常侍李若使於陳冬十一月丁卯晉王廣來朝十二月丁
未降囚徒

六年春正月甲子党項羌內附庚子班曆於突厥壬申使戶部尚
書蘇威巡省山東二月乙酉山南荆浙七州水遣前工部尚書長
孫毗振恤之景戌制刺史上佐每歲暮更入朝上考課丁亥發丁
男十一萬修築長城二旬而罷庚子大赦三月己未洛陽男子高

德上書請帝爲太上皇傳位皇太子帝曰朕承天命撫育蒼生日
盱孜孜猶恐不逮豈學近代帝王事不師古傳位於子自求逸樂
哉癸亥突厥沙鉢略可汗遣使朝貢夏四月己亥陳人來聘秋七
月辛亥河南諸州水乙丑京師雨毛如馬尾長者二尺餘短者有
六七寸八月辛卯關內七州旱蠲其賦稅遣散騎常侍裴世豪使
于陳戊申上柱國太師申公李穆薨閏月丁卯皇太子鎮洛陽辛
未晉王廣秦王俊竝來朝景子上柱國郟公梁士彥上柱國杞公
宇文忻柱國舒公劉昉謀反伏誅上柱國許公宇文善有罪除名
九月辛巳帝素服御射殿詔百寮射梁士彥三家資物景戌上柱
國宋安公元景山卒辛丑詔振恤大象以來死事之家冬十月己
酉以河北道行臺尚書令并州總管晉王廣爲雍州牧餘官如故
以兵部尚書楊尚希爲禮部尚書癸丑置山南道行臺尚書省於

襄州以秦王俊爲尚書令

七年春正月癸巳祀太廟乙未制諸州歲貢三人二月丁巳祀朝
日于東郊己巳陳人來聘壬申幸醴泉宮是月癸丁男十萬修築
長城二旬而罷夏四月庚戌於揚州開山陽瀆以通運漕突厥沙
鉢略可汗卒癸亥頒青龍符於東方總管刺史西方以白武南方
以朱雀北方以玄武甲戌遣兼散騎常侍楊周使于陳以戶部尚
書蘇威爲吏部尚書五月乙亥朔日有蝕之己卯隕石於武安滏
陽間十餘里秋七月己丑衛王爽薨八月庚申梁主蕭琮來朝九
月乙酉梁安平王蕭巖掠于其國以奔陳辛卯廢梁國曲赦江陵
以梁主蕭琮爲柱國封莒國公冬十月庚申行幸同州以先帝所
居故曲降囚徒癸亥幸蒲州景寅宴父老上極歡曰此間人物衣
服鮮麗容止閑雅良由仕宦之鄉陶冶成俗也十一月甲午幸馮

翊祭故社父老對詔失旨上大怒免其縣官而去戊戌車駕至自馮翊

八年春正月乙亥陳人來聘二月辛酉陳人寇碭州三月辛未上柱國隴西公李詢卒甲戌遣兼散騎常侍程尚賢使于陳戊寅詔大舉伐陳秋八月丁未河北諸州饑遣吏部尚書蘇威振恤之九月癸巳嘉州言龍見冬十月巳未置淮南行臺省于壽春以晉王廣爲尚書令辛酉陳人來聘拘留不遣甲子有星孛于牽牛享太廟授律令晉王廣秦王俊清河公楊素竝爲行軍元帥以伐陳於是晉王出六合秦王出襄陽清河公楊素出信州荊州刺史劉仁恩出江陵宜陽公王世積出蘄春新義公韓擒出廬江襄邑公賀若弼出吳州落叢公燕榮出東海合總管九十兵五十一萬八千皆受晉王節度東接滄海西拒巴蜀旌旃舟楫橫亘數千里仍曲

赦陳國十一月丁卯車駕餞師詔購陳叔寶位上柱國萬戶公乙

亥行幸定城陳師誓衆景子幸河東十二月車駕至自河東

九年春正月癸酉以尚書左僕射虞慶則爲右衛大將軍景子負若弼敗陳師於蔣山獲其將蕭摩訶韓擒進師入建鄴獲陳主叔寶陳國平合州四十郡一百縣四百戶五十萬口二百萬癸巳遣使持節巡撫之二月乙未廢淮南尚書省景申制五百家爲鄉正一人百家爲里長一人夏四月巳亥幸驪山親勞旋師乙巳三軍凱入獻俘於太廟以晉王廣爲太尉庚戌帝御廣陽門宴將士頒賜各有差辛亥大赦以陳都官尚書孔範散騎常侍王瑳王儀御史中丞沈觀等邪佞於其主以致亡滅皆投之邊裔陳人普給復十年軍人畢世免徭役擢陳之文武衆才而用之宮奴數千可歸者歸之其餘盡以分賜將士及王公貴臣其資物皆於五塚賜王

公以下大射毀所得秦漢三大鍾越二大鼓又設亡陳女樂謂公卿等曰此聲似啼朕聞之甚不喜故與公等一聽亡國之音俱爲永鑿焉辛酉以吏部侍郎宇文弼爲刑部尚書宗正卿楊昇爲工部尚書壬戌詔曰今率土大同舍生遂性兵可立威不可不戢刑可助化不可專行禁衛九重之餘鎮守四方之外戎旅軍器皆宜停罷武力之子俱可學文人間甲杖悉皆除毀閏月丁丑頒木魚符於總管刺史雌一雄三巳卯以吏部尚書蘇威爲尚書右僕射六月乙丑以荊州總管楊素爲納言丁卯以吏部侍郎盧愷爲禮部尚書時群臣咸請封禪詔不許曰豈可命一將軍除一小國以薄德而封名山用虛言而干上帝邪八月壬戌以廣平王雄爲司空冬十一月壬辰考使定州刺史豆盧通等上表請封禪上不許庚子以右衛大將軍虞慶則爲右武侯大將軍右領軍將軍李安

爲右領軍大將軍甲寅降囚徒十二月甲子詔太常卿牛弘通直散騎常侍許善心祕書丞姚察通直郎虞世基等議定樂

十年春正月乙未以皇孫昭爲河南王楷爲華陽王二月庚申行幸并州夏五月乙未詔曰魏末喪亂寓縣瓜分役軍歲動未遑休息兵士軍人權置坊府南征北伐居處無定家無完堵地罕苞桑恒爲流寓之人竟無鄉里之號朕甚愍之凡是軍人可悉屬州縣墾田籍帳一同編戶軍府統領宜依舊式罷山東河南及北方緣邊之地新置軍府六月辛酉制人年五十免役折庸秋七月癸卯以納言楊素爲內史令庚戌上親錄囚徒辛亥高麗遼東郡公高陽卒八月壬申遣柱國韋洸上開府王景竝持節巡撫嶺南百越皆服九月丁酉至自并州冬十月甲子頒木魚符于京官五品以上十一月辛卯幸國學頒賜各有差辛丑祀南郊是月婺州人汪

文進會稽人高智慧蘇州人沈玄愴皆舉兵反自稱天子樂安蔡道人饒州吳世華永嘉沈季徹泉州王國慶餘杭楊寶英交趾李春等皆自稱大都督詔內史令楊素討平之是歲吐谷渾契丹竝遣使朝貢

十一年春正月丁酉以平陳所得古器多爲禍變悉命毀之景午皇太子妃元氏薨上舉哀於東宮文思殿二月戊午以大將軍蘇季慈爲工部尚書景子以臨穎令劉曠政績尤異擢爲莒州刺史辛巳晦日有蝕之夏五月乙巳以右衛將軍元旻爲左衛大將軍秋八月壬申滕王瓚薨乙亥上柱國沛國公鄭譯卒是歲高麗靺鞨竝遣使朝貢突厥獻七寶盤

十二年春二月己巳以蜀王秀爲內史令兼右領軍大將軍以漢王諒爲雍州牧右衛大將軍秋七月乙巳尚書右僕射邳公蘇威禮部尚書容城侯盧愷竝坐事除名壬申晦日有蝕之八月甲戌制天下死罪諸州不得便決皆令大理覆之癸巳制宿衛者不得輒離所守丁酉上柱國楚公豆盧勣卒戊戌上親錄囚徒冬十月丁丑以遂安王集爲衛王壬午祀太廟至太祖神主前帝流涕嗚咽不自勝十一月辛亥祀南郊己未上柱國新義公韓擒卒甲子百寮大射於武德殿十二月乙酉以內史令楊素爲尚書右僕射是歲突厥吐谷渾靺鞨竝遣使朝貢

十三年春正月乙巳上柱國郇公韓建業卒壬子祀感帝己未以信州總管韋世康爲吏部尚書壬戌行幸岐州二月景子詔營仁壽宮丁亥至自岐州己卯立皇孫暕爲豫章王戊子晉州刺史南陽郡公賈悉達隰州總管撫寧郡公韓延等以賄伏誅己丑制坐事去官者配防一年丁酉制私家不得隱藏緯候圖讖夏五月癸

亥詔禁人間撰集國史臧否人物秋七月戊辰晦日有蝕之九月
景辰降囚徒庚申封邵公楊綸爲滕王冬十一月乙卯上柱國華
陰公梁彥光卒是歲契丹霄室韋靺鞨竝遣使朝貢

十四年夏四月乙丑詔曰比命有司總令研究正樂雅聲詳定已
訖宜卽施用見行者停人間音樂流僻日久棄其舊體競造繁聲
流宕不歸遂以成俗宜加禁約務存其本五月辛酉京師地震關
內諸州旱六月丁卯詔省府州縣皆給廩田不得興生與人爭利
秋七月乙未以邵公蘇威爲納言八月辛未關中大旱人饑行幸
洛陽并命百姓山東就食冬閏十月甲寅詔曰梁齊陳往皆創業
一方綿歷年代旣宗祀廢絕祭奠無主興言矜念良以愴然莒國
公蕭琮及高仁英陳叔寶等宜令以時世修祭祀所須器物有司
給之乙卯制外官九品以上父母及子年十五不得從之官十一

月壬戌制州縣佐史三年一代不得重任癸未有星孛于角亢十
二月乙未東巡狩

十五年春正月壬戌車駕次齊州親問疾苦景寅旅王符山庚午
以歲旱祀太山以謝愆咎大赦二月景辰禁私家畜兵器關中緣
邊不在其例禁河以東無得乘馬丁巳上柱國蔣公梁睿卒三月
巳未車駕至自東巡望祭五嶽海濱丁亥幸仁壽宮夏四月巳丑
朔大赦甲辰以趙州刺史楊達爲工部尚書五月丁亥制京官五
品以上佩銅魚符六月戊子詔鑿砥柱庚寅相州刺史豆慮通貢
綾文布命焚之于朝堂辛丑詔名山未在祀典者悉命祀之秋乙
月甲戌遣邵公蘇威巡省江南戊寅至自仁壽宮辛巳制九品以
上官以理去官者竝聽執笏冬十二月戊子敕盜邊糧一升以上
皆斬籍沒其家巳丑詔文武官以四考更代是歲吐谷渾林邑等

國竝遣使朝貢

十六年春二月丁亥封皇孫裕爲平原王筠爲安成王嶷爲安平王恪爲襄城王該爲高陽王韶爲建安王暕爲潁川王夏六月甲午制工商不得進仕并州大蝗辛丑詔九品以上妻五品以上妾夫亡不得改嫁秋八月庚戌詔決死罪者三奏而後行刑冬十八巳丑幸長春宮十一月壬子至自長春宮

十七年春二月癸未太平公史萬歲伐西寧尅之庚寅行幸仁壽宮庚子上桂國王世積討桂州賊李光仕平之三月景辰詔諸司屬官有犯聽于律令外斟酌決杖辛酉上親錄囚徒癸亥上桂國彭城公劉昶以罪伏誅庚午遣御史柳彧皇甫誕巡省河南北夏四月戊寅頒新曆五月庚申宴百寮於玉女泉班賜各有差巳巳蜀王秀來朝閏月巳卯群鹿入殿門馴擾侍衛之內秋七月丁丑

桂州人李世賢反遣右武侯大將軍虞慶則討平之丁亥并州總管秦王俊坐事免以王就第九月甲申車駕至自仁壽宮庚寅上謂侍臣曰廟庭設樂本以迎神齋祭之日觸目多感當此之際何可爲心在路奏樂禮爲未允公卿宜更詳之冬十月丁未頒銅武符於驃騎車騎府戊申道王靜薨庚午詔曰五帝異樂三王殊禮皆隨事而有損益因情而立節文仰惟祭享宗廟瞻敬如在罔極之感情深茲日而禮畢升路鼓吹發音還入宮門金石振響斯則哀樂同日心事相違情所不安理寔未允宜改茲往式用弘禮教自今享廟日不須備鼓吹殿庭勿設樂縣辛未京下大索十二月壬子上桂國右武侯大將軍魯公虞慶則以罪伏誅是歲高麗突厥竝遣使朝貢

十八年春正月辛丑詔曰吳越之人往承弊俗所在之處私造大

船因相聚結致有侵害江南諸州人間有船長三丈以上悉括入官二月甲辰幸仁壽宮乙巳以漢王諒爲行軍元帥水陸三十萬伐高麗夏五月辛亥詔畜猫鬼蠱毒厭魅野道之家投于四裔六月景寅詔黜高麗王高元官爵秋八月景子詔京官五品以上總管刺史舉志行修謹清平幹濟之士九月巳丑漢王諒師遇疾疫而旋死者十二三庚寅敕舍客無公驗者坐及刺史縣令辛卯車駕至自仁壽宮冬十一月甲戌帝親錄囚徒癸未祀南郊十二月庚子上柱國夏州總管東萊公王景以罪伏誅是歲自京師至仁壽宮置行宮十所祀宋陳亳曹戴穎等州水詔並免庸調十九年春正月癸酉大赦戊寅大射於武德殿二月巳亥晉王廣來朝甲寅幸仁壽宮夏四月丁酉突厥利可汗內附達頭可汗犯塞行軍總管史萬歲擊破之六月丁酉以豫章王暕爲內史令秋

八月癸卯上柱國尚書左僕射齊公高穎坐事免辛亥上柱國皖城公張威卒甲寅上柱國城陽公李徹卒九月乙丑以太常卿牛弘爲吏部尚書冬十月甲午以突厥利可汗爲啓人可汗築大川城處其部落十一月有司言元年巳來日漸長十二月乙未突厥都藍可汗爲部下所殺國大亂星隕於勃海二十年春正月辛酉朔突厥高麗契丹並遣使朝貢二月丁丑無雲而雷三月辛卯熙州人李英林反遣行軍總管張衡討之夏四月壬戌突厥犯塞以晉王廣爲行軍元帥擊破之乙亥天有聲如寫水自南而北六月丁丑秦王俊薨秋九月丁未車駕至自仁壽宮冬十月乙丑廢皇太子勇及其諸子竝爲庶人殺柱國太平公史萬歲巳巳殺左衛大將軍五原公元旻十一月戊子以晉王廣爲皇太子天下地震京城大風雪十二月戊午詔東宮官屬於皇

太子不得稱臣辛巳詔毀壞偷盜佛及天尊像嶽鎮海濱神形者以不道論沙門壞佛像道士壞天尊像以惡逆論

仁壽元年春正月乙酉朔大赦改元以尚書右僕射楊素爲左僕射以納言蘇威爲右僕射丁酉徙河南王昭爲晉王突厥寇恒安遣柱國韓洪擊之敗焉以晉王昭爲內史令辛丑詔曰投生殉節自古稱難殞身王事禮加二等而世俗之徒不達大義致命戎旅不入兆域興言念此每深愍歎且入廟祭祀並不廢闕何止墳塋獨在其外自今戰亡之徒宜入墓域二月乙卯朔日有蝕之夏五月巳丑突厥男女九萬餘口來降壬辰驟雨震雷大風拔木宜君湫水移於始平六月乙卯遣十六使巡省風俗乙丑廢太學及州縣學唯留國子一學取正三品以上子七十二人充生頒舍利于諸州秋七月戊戌改國子爲太學冬十一月巳丑祀南郊十二月楊

素擊突厥大破之

二年春三月巳亥幸仁壽宮夏四月庚戌歧雍二州地震秋七月景戌詔內外官各舉所知八月巳巳皇后獨孤氏崩九月景戌車駕至自仁壽宮壬辰河南北諸州大水遣工部尚書楊逵振恤之乙未上柱國袁州總管金水公周搖卒隴西地震冬十月壬子曲赦益州管內癸丑以工部尚書楊逵爲納言閏月甲申詔尚書左僕射楊素與諸術者判定陰陽舛謬巳丑詔楊素右僕射蘇威吏部尚書牛弘內史侍郎薛道衡祕書丞許善心內史舍人虞世基著作郎王劭等修定五禮壬寅葬獻皇后於太陵十二月癸巳益州總管蜀王秀有罪廢爲庶人交州人李佛子舉兵反遣行軍總管劉方討平之

三年春二月戊子以大將軍蔡陽郡公姚辨爲左武侯大將軍夏

五月癸卯詔曰六月十三日是朕生日其日令海內爲武元皇帝
元明皇后斷屠六月甲午詔曰禮云親以朞斷蓋以四時之變易
萬物之更始故聖人象之其有三年加隆爾也但家無二尊母爲
厭降是以父在喪母還服于朞者服之正也豈容朞內而更小祥
然三年之喪而有小祥者禮云朞祭禮也朞而除喪道也以是之
故雖未再朞而天地一變不可不祭不可不除故有練焉以存喪
祭之本然朞喪有練於理未安雖云十一月而練乃無所法象非
朞非時豈可除祭而儒者徒擬三年之喪立練禫之節可謂苟存
其變而失其本欲漸於奪乃薄於喪致使子則冠練去經黃裏縗
緣經則布葛在躬麤服未改豈非經哀尚存于情已奪親疎失倫
輕重顛倒乃不順人情豈聖人之意也故非先聖之禮廢于人邪
三年之喪尚有不行者至於祥練之節安能不墜者乎禮云父

母之喪無貴賤一也而大夫士之喪父母乃貴賤異服然則禮壞
樂崩由來漸矣所以晏平仲之斬麤縗其老謂之非禮滕文公之
服三年其臣咸所不欲蓋由王道旣衰諸侯異政將踰越於法度
惡禮制之害已乃滅去篇籍自制其宜遂至骨肉之恩輕重從俗
無易之道降殺任情夫禮不從天降不從地出乃人心而已者謂
情緣于恩也故恩厚者其禮隆情輕者其禮殺聖人以此稱情立
文別親疎貴賤之節自臣子道消上下失序莫大之恩逐情而薄
莫重之化與時而殺此乃服不稱喪容不稱服非所謂聖人緣恩
表情制禮之義也然喪與其易也寧在于戚則禮之本也禮有其
餘未若于哀則情之實也今十一月而練者非禮之本非情之實
由是言之父在喪母不宜有練但依禮十二月而祥中月而禫庶
以合聖人之意達人子之心秋七月丁卯詔州縣搜揚賢哲皆取

明知古今通識安危究政教之本達禮樂之源不限多少不得不舉徵召將送必須以禮八月壬申上柱國檢校幽州總管落萊公燕榮以罪伏誅九月壬戌置常平官甲子以營州總管韋沖爲戶部尚書十二月癸酉河南諸州遣納言楊達振恤之

四年春正月景辰大赦甲子幸仁壽宮夏四月乙卯上不豫六月庚午大赦有星入月中數日而退長人見於鴈門秋七月乙未日青無光八日乃復甲辰帝疾甚臥於仁壽宮與百寮辭訣上握手歔歔丁未崩于大寶殿時年六十四詔曰嗟乎自昔晉室播遷天下喪亂四海不一以至周齊戰爭相尋年將三百故割疆土者非一所稱帝王者非一人書軌不同生靈塗炭上天降監受命于朕用登大位豈關人力故得撥亂反正偃武修文天下大同聲教遠被此又是天意欲寧區夏所以昧旦臨朝不敢逸豫一日萬幾留

心親覽晦明寒暑不憚劬勞匪曰朕躬蓋爲百姓故也王公卿士每日闕庭刺史以下歲時朝集何嘗不罄竭心府誠敷殷勤義乃君臣情兼父子庶藉百寮之智萬國歡心欲令率土之人永得安樂不謂遘疾彌留至于大漸此乃人生常分何足言及但四海百姓衣食不豐教化政刑猶未盡洽興言及此唯以留恨朕今踰六十不復稱天但筋力精神一時勞竭如此之事本非爲身止欲安養百姓所以致此人生子孫誰不念愛旣爲天下事須割情勇及秀等竝懷悖惡旣無臣子之心所以黜廢古人有云知臣莫若君知子莫若父令勇秀得志共理家國亦當戮辱遍於公卿酷毒流於人庶今惡子孫已爲百姓黜屏好子孫足堪負荷大業此雖朕家事理不容隱前對文武侍衛具已論述皇太子廣地居上嗣仁孝著聞以其行業堪成朕志但念內外群官同心戮力以此共安

天下朕雖瞑目何所復恨國家大事不可限以常禮既葬公除行之自昔今宜遵用不勞改定凶禮所須纔令周事務從節儉不得勞人諸州總管刺史以下宜率其職不須奔赴自古哲王因人作法前帝後帝沿革隨時律令格式有不便于事者宜依前修改務當政要嗚呼敬之哉無墜朕命乙卯發喪河間楊柳四株無故黃落既而花葉復生八月丁卯梓宮至自仁壽宮景子殯於大興前殿冬十月乙卯葬于太陵同墳而異穴士庶赴葬者皆聽人視陵內帝性嚴重有威容外質木而內明敏有大略初得政之始群情不附諸子幼弱內有六王之謀外致三方之亂握強兵居重鎮者皆周之舊臣上推以赤心各盡其用不踰期月尅定三邊未及十年平一四海薄賦斂輕刑罰內修制度外撫戎夷每日聽朝日仄忘倦居處服翫務存節儉令行禁止上下化之開皇仁壽之間文

夫不衣綾綺而無金玉之飾常服率多布帛裝帶不過以銅鐵骨角而已雖嗇於財至于賞賜有功亦無所愛惜每乘輿四出路逢上表者駐馬親自臨問或潛遣行人采聽風俗吏政得失人間疾苦無不留意嘗遇關中饑遣左右視百姓所食有得豆屑雜糠而奏之者上流涕以示群臣深自咎責爲之損膳而不御酒肉者殆將一期及東拜太山關中戶口就食洛陽者道路相屬帝敕斥候不得輒有驅逼男女參廁于仗衛之間遇逢扶老攜幼者輒引馬避之慰勉而去至艱嶮之處見負擔者遽令左右扶助之其有將士戰歿必加優賞仍令使者就家勞問自強不息朝夕孜孜人庶殷繁帑藏充實雖未能致臻于至道亦足稱近代之良主然雅性沈猜素無學術好爲小數言神燭聖杖堪能療病又信王劭解石文以爲已瑞焉不達大體如是故忠臣義士莫得盡心竭辭其草

創元勳及有功諸將誅夷獲罪罕有存者又不悅詩書楊素由之
希旨遂奏除學校唯婦言是用廢黜諸子逮于暮年持法尤峻喜
怒失常果於殺戮常令左右送西域朝貢使出關其所經之處
受牧宰小物饋鸚鵡麀皮馬鞭之屬聞而大怒又詣武庫見署中
蕪穢不理于是執武庫令及諸受遺者出開遠門外親自臨決死
者數十人又往往潛令賂遺令史府史受者必死無所寬貸議者
以此少之

論曰隋文帝樹基立本積德累仁徒以外戚之尊受託孤之任與
能之議未爲所許是以周室舊臣咸懷憤惋既而王謙固三蜀之
阻不踰期月尉遲迴舉全齊之衆一戰而亡斯乃非止人謀抑亦
天之所贊乘茲機運遂還周鼎于時蠻夷猾夏荆揚未一劬勞日
仄經營四方樓船南邁則金陵失險驃騎北指則單于款塞職方

所載竝入疆理禹貢所圖咸受正朔雖晉武之克平吳會漢宣之
推亡固存比義論功不能尚也七德旣敷九歌已洽尉候無警遐
邇肅清於是躬節儉平徭賦倉廩實法令行君子咸樂其生小人
各安其業強不陵弱衆不暴寡人物殷阜朝野歡娛自開皇二十
年間天下無事區宇之內晏如也考之前王足以參蹤盛烈而素
無術業不能盡下無寬仁之度有刻薄之資暨乎暮年此風愈扇
又雅好瑞符暗于大道建彼維城權侔京室皆同帝制靡所適從
聽妒婦之言惑邪臣之說溺寵廢嫡託付失所滅父子之道開昆
弟之隙縱其尋斧翦伐本根墳土未乾子孫繼踵爲戮松檟纒列
天下已非隋有惜哉迹其衰怠之源稽其亂亡之兆起自文皇成
於煬帝所由來遠矣非一朝一夕其不祀忽諸未爲不幸也

隋本紀上第十一終

藝川世鳳
氏書印

北史卷十二

隋本紀下第十二

藝川世鳳
氏書印

煬皇帝諱廣一名英小字阿廢高祖第二子也母曰文獻獨孤皇后上美姿儀少敏慧高祖及后於諸子中特所鍾愛在周以高祖勳封鴈門郡公開皇元年立為晉王拜柱國并州總管時年十三尋授武衛大將軍進上柱國河北道行臺尚書令大將軍如故高祖令項城公欽安道公才李徹輔導之上好學善屬文沈深嚴重朝野屬望高祖密令善相者來和徧視諸子和曰晉王眉上雙骨隆起貴不可言既而高祖幸上所居第見樂器絃多斷絕又有塵埃若不用者以為不好聲妓之翫上尤自矯飾當時稱為仁孝嘗觀獵遇雨左右進油衣上曰士卒皆霑溼我獨衣此乎乃令持去六年轉淮南道行臺尚書令其年徵拜雍州牧內史令八年冬大

舉伐陳以上爲行軍元帥及陳平執陳湘州刺史施文慶散騎常侍沈客卿市令湯慧朗刑法監徐析尚書都令史暨慧以其邪佞有害于民斬之石闕下以謝三吳於是封府庫資財無所取天下稱賢進位太尉賜路車乘馬袞冕之服玄珪白璧各一雙復拜并州總管俄而江南高智慧等相聚作亂徙上爲揚州總管鎮江都每歲一朝高祖之祠太山也領武侯大將軍明年歸藩後數載突厥寇邊復爲行軍元帥出靈武無虜而旋及太子勇廢立上爲皇太子是月當受冊高祖曰吾以大興公成帝業令上出舍大興其夜烈風大雪地震山崩民舍多壞壓死者百餘口仁壽初奉詔巡撫東南是後高祖每避暑仁壽宮恒令上監國四年七月高祖崩上卽皇帝位於仁壽宮八月奉梓宮還京師并州總管漢王諒舉兵反詔尚書左僕射楊素討平之九月乙巳以備身將軍崔彭爲

左領軍大將軍十一月乙未幸洛陽景申癸丁男十數萬掘塹自龍門東接長平汲郡抵臨清關度河至浚儀襄城達於上洛以置關防癸丑詔曰乾道變化陰陽所以消息沿創不同生靈所以順序若使天意不變施化何以成四時人事不易爲政何以利萬姓易不云乎通其變使民不倦變則通通則久有德則可久有功則可大朕又聞之安安而能遷民用丕變是故姬邑兩周如武王之意殷人五徙成湯后之業若不因民順天功業見乎變愛民治國者可不謂歟然雒邑自古之都王畿之內天地之所合陰陽之所和控以三河固以四塞水陸通貢賦等故漢祖曰吾行天下多矣唯見雒陽自古皇王何嘗不留意所不都者蓋有由焉或以九州未一或以困其府庫作雒之制所以未暇也我有隋之始便欲創茲懷雒日復一日越暨于今念茲在茲興言感哽朕肅膺寶曆纂

臨萬邦遵而不失心奉先志今者漢王諒悖逆毒被山東遂令州縣或淪非所由關河懸遠兵不赴急加以并州移戶復在河南周遷殷民意在於此況復南服遐遠東夏殷大因機順動今也其時群司百辟僉諧厥議但成周墟堦弗堪胥宇今可於伊維營建東京便卽設官分職以爲民極也夫宮室之制本以便生人上棟下宇足以避風露高臺廣廈豈曰適形故傳云儉德之恭侈惡之大宜尼有云與其不遜也寧儉豈謂瑤臺瓊室方爲宮殿者乎土階采椽而非帝王者乎是知非天下以奉一人乃一人以主天下也民惟國本本固邦寧百姓足孰與不足今所營構務從節儉無令雕牆峻宇復起於當今欲使卑宮菲食將貽于後世有司明爲條格稱朕意焉十二月乙丑以右武衛將軍來護兒爲右驍衛大將軍戊辰以柱國李景爲右武衛大將軍以右衛率周羅暉爲右武

候大將軍

大業元年春正月壬辰朔大赦改元立妃蕭氏爲皇后改豫州爲溱州洛州爲豫州廢諸州總管府景申立晉王昭爲皇太子丁酉以上柱國宇文述爲左衛大將軍上柱國郭衍爲左武衛大將軍延壽公于仲文爲右衛大將軍己亥以豫章王暕爲豫州牧戊申發八使巡省風俗下詔曰昔者哲王之理天下也其在愛民乎旣富而教家給人足故能風教淳厚遠至邇安理定功成率由斯道朕恭嗣寶位撫育黎獻夙夜戰兢若臨川谷雖則聿遵先緒弗敢失墜永言政術多有缺然況以四海之遠兆民之衆未獲親臨問其疾苦每慮幽仄莫舉冤屈不申一物失所用傷和氣萬方有罪責在朕躬所以興寤增歎而夕惕載懷者也今旣布政惟始宜存寬大可分遣使人巡省方俗宣揚風化薦拔淹滯申達幽枉孝悌

力田給以優復鰥寡孤獨不能自存者量加振濟義夫節婦旌表門閭高年之老加其板授並依別條賜以粟帛篤疾之徒給侍丁者雖有侍養之名曾無調贍之實明加檢校使得存養若有名行顯著操履修潔及學業才能一藝可取咸宜訪採將身入朝所在州縣以禮發遣其蠹政害人不便於時者使還之日具錄奏聞已酉以吳州總管宇文弼爲刑部尚書二月己卯以尚書左僕射楊素爲尚書令三月丁未詔尚書令楊素納言楊達將作大匠宇文愷營建東京徙豫州郭下居民以實之戊申詔曰聽採輿頌謀及黎庶故能審政刑之得失是知昧且思治欲使幽枉必達彝倫有章而牧宰任稱朝委苟爲僥倖以求考課虛立殿最不存理實綱紀於是不理冤屈所以莫申關河重阻無由自達朕故建立東京躬親存問今將巡歷淮海觀省風俗眷求讜言徒繁詞翰而鄉校

之內闕爾無聞恇然夕惕用勞興寢其民下有知州縣官人政理苛刻侵害百姓背公徇私不便於民者聽詣朝堂封奏庶乎四聰以達天下無冤又於阜澗營顯仁宮採海內奇禽異獸艸木之類以實園苑徙天下富商大賈數萬家於東京辛亥發河南諸郡男女七百萬開通濟渠自西苑引穀洛水達于河自板渚引河通于淮庚申遣黃門侍郎王弘上儀同於士澄往江南採木造龍舟鳳舫黃龍赤艦樓船等數萬艘夏四月癸亥大將軍劉仲方擊林邑破之五月庚戌戶部尚書義豐侯韋沖卒甲子熒惑入太微秋七月丁酉制戰亡之家給復十年景午滕王綸衛王集竝奪爵徙邊閏七月甲子以尚書令楊素爲太子太師安德王雄爲太子太傅河間王弘爲太子太保景子詔曰君民建國教學爲先移風易俗必自茲始而言絕義乖多歷年代進德修業其道浸微漢採坑焚

之餘不絕如線晉承板蕩之運掃地將盡自時厥後軍國多虞雖復鬻宇時建示同愛禮函丈或陳殆爲虛器遂使紆青拖紫非以學優製錦操刀類多牆面上陵下替綱維不立雅缺道消寔由于此朕纂承洪緒思演大訓將欲尊師重道用闡厥繇講信修睦敦獎名教方今區宇平壹文軌攸同十步之內必有芳草四海之中豈乏季秀諸在家及見入學者若有篤志好古耽典悅禮學行優敏堪膺時務所在採訪具以名聞卽當隨其器能擢以不次若研精經術未願進仕可依其藝業深淺門蔭高卑雖未升朝竝量準給祿庶夫恂恂誘善不日成器濟濟盈朝何遠之有其國子等學亦宜申明舊制教習生徒具爲課試之法以盡砥礪之道八月壬寅上御龍舟幸江都以左武衛大將軍郭衍爲前軍右武衛大將軍李景爲後軍文武官五品已上給樓船九品已上給黃篋舳舻

相接二百餘里冬十月己丑赦江淮已南揚州給復五年舊總管內給復三年十一月己未以大將軍崔仲方爲禮部尚書二年春正月辛酉東京成賜監督者有差以大理卿梁毗爲刑部尚書丁卯遣十使併省州縣二月景戌詔尚書令楊素吏部尚書牛弘大將軍宇文愷內史侍郎虞世基禮部侍郎許善心制定輿服始備輦輅及五時副車上常服皮弁十有二琪文官弁服珮玉五品已上給犢車通幃三公親王加油絡武官平巾幘袴褶三品已上給袍襪下至胥吏服色各有差非庶人不得戎服戊戌置都尉官三月庚午車駕發江都先是太府少卿何稠太府丞雲定與盛修儀仗於是課州縣送羽毛百姓求捕之網羅被水陸禽獸有堪斃耗之用者殆無遺類至是而成夏四月庚戌上自伊闕陳法駕備千乘萬騎入於東京辛亥上御端門大赦天下免今年租賦

癸丑以冀州刺史楊文思爲民部尚書五月甲寅金紫光祿大夫
兵部尚書李通坐事免乙卯詔曰旌表先哲式在饗祀所以優禮
賢能顯彰遺愛朕永鑒前修尚想名德何嘗不興歎九原屬懷千
載其自古以來賢人君子有能樹聲立德佐世匡時博利殊功有
益于人者竝宜營立祠宇以時致祭墳壟之處不得侵踐有司量
爲條式稱朕意焉六月壬子以尚書令太子太師楊素爲司徒進
封豫章王暕爲齊王秋七月癸丑以衛尉卿衛玄爲工部尚書庚
申制百官不得計考增級必有德行功能灼然顯著者擢之壬戌
擢藩邸舊臣鮮于羅等二十七人官爵有差甲戌皇太子昭薨乙
亥上柱國司徒楚國公楊素薨八月辛卯封皇孫倓爲燕王侗爲
越王侑爲代王九月乙丑立秦王俊子浩爲秦王冬十月戊子以
靈州刺史段文振爲兵部尚書十二月庚寅詔曰前代帝王因時

創業君民建國禮尊南面而歷運推移年代永久丘壘殘毀樵牧
相趨塋兆堙蕪封樹莫辨興言淪滅有愴于懷自古以來帝王陵
墓可給隨近十戶蠲其雜役以供守視

三年春正月癸亥敕并州逆人已流配而逃亡者所獲之處卽宜
斬決景子長星竟天出于東壁二旬而止是月武陽郡士言河水
清二月己丑彗星見於東井文昌歷大陵五車北河入太微掃帝
座前後百餘日而止三月辛亥車駕還京師壬子以大將軍姚辨
爲左衛將軍癸丑遣羽騎朱寬使於流求國乙卯河間王弘薨夏
四月庚辰詔曰古者帝主觀風俗皆所以憂勤兆庶安集遐荒自
蕃夷內附未遑親撫山東經亂復加存恤今欲安輯河北巡省趙
魏所司依式甲申頒律令大赦天下關內給復三年壬辰改州爲
郡改度量衡竝依古式改上柱國以下官爲大夫甲午詔曰天下

之重非獨理所安帝王之功豈一士之略自古明君哲后立政經
邦何嘗不選賢與能振拔淹滯周稱多士漢號得人尚想前風載
懷欽佇朕負宸夙興冕旒待旦引領巖谷寘以周行冀與群才共
康庶績而藁茅寂漠投竿罕至豈美璞韜采未值良工將介石在
懷確乎難拔永鑒前哲憮然興歎凡厥在位譬諸股肱若濟巨川
義同舟楫豈得係茲寵祿晦爾所知優游卒歲甚非謂也祁大夫
之舉善良史以爲至公臧文仲之蔽賢尼父譏其竊位求諸往古
非無褒貶宜思進善用匡寡薄夫孝悌有聞人倫之本德行敦厚
立身之基或節義可稱或操履清潔所以激貪厲俗有益風化強
毅正直執憲不撓學業優敏文才美秀竝爲廊廟之用寔乃瑚璉
之資才堪將略則拔之以禦侮力有驍壯則任之以爪牙爰及一
藝可取亦宜採錄若衆善畢舉與時無棄以此求理庶幾非遠文

武有職事者五品已上宜依令十科舉人有一於此不必求備朕
當待以不次隨才升用其見任九品已上官者不在舉送之限景
申車駕北巡狩丁酉以刑部尚書宇文弼爲禮部尚書戊戌敕百
司不得殘暴禾稼其有須開爲路者有司計地所收卽以近倉酬
賜務從優厚己亥至赤岸澤以太牢祭故太師李穆五月丁巳突
厥啓民可汗遣子拓特勒來朝戊午發河北十餘郡丁男自太行
山達于并州以通馳道景寅啓民可汗遣其兄子毗黎伽特勒來
朝辛酉啓民可汗使請自入塞奉迎輿駕上不許癸酉有星孛于
文昌上將星常皆動搖六月辛巳獵于連谷丁亥詔曰聿思孝饗
德莫至焉崇建寢廟禮之大者然則質文異代損益殊時學滅坑
焚經典散逸憲章湮墜廟堂制度師說不同所以世數多少莫能
是正連室異宮亦無定准朕獲奉祖宗欽承景業永惟嚴配冀隆

大典於是詢謀在位博訪儒術咸以爲高祖文皇帝受天明命奄有區夏拯群飛於四海革彫弊於百五恤獄緩刑生靈皆遂其性輕徭薄賦比屋各安其業芟夷宇宙混一車書東漸西被無思不服南征北怨俱荷來蘇駕毳乘風歷代所弗至辨髮左衽聲教所罕及莫不厥角關塞頓頽闕庭譯靡絕時書無虛月韜戈偃伯天下晏如嘉瑞休徵表裏褫福猷偉歟無得而名者也朕又聞之德厚者流光理辨者禮縟是以周之文武漢之高光其典章特立諡號斯重豈非緣情稱述卽崇顯之義乎高祖文皇帝宜別建廟宇以彰巍巍之德仍遵月祭用表蒸蒸之懷有司以時創造務合典制文名位旣殊禮亦異等天子七廟事著前經諸侯二昭義有差降故知以多爲貴王者之禮今可依用貽厥後昆戊子次榆林郡丁酉啓民可汗來朝己亥吐谷渾高昌竝遣使貢方物甲辰上

御北樓觀漁于河以宴百寮秋七月辛亥啓民可汗上表請變服襲冠帶詔啓民贊拜不名在諸侯王上甲寅上於郡城東御大帳其下備儀衛建旌旗宴啓民及其部落三千五百人奏百戲之樂賜啓民及其部落各有差丙子殺光祿大夫賀若弼禮部尚書宇文弼太常卿高頴尚書左僕射蘇威坐事免發丁男百餘萬築長城西距榆林東至紫河二旬而罷死者十五六八月壬午車駕發榆林乙酉啓民飾廬清道以候乘輿帝幸其帳啓民奉觴上壽宴賜極厚上謂高麗使者曰歸語爾王當早來朝見不然者吾與啓民巡彼土矣皇后亦幸義城公主帳己丑啓民可汗歸蕃癸巳入樓煩關壬寅次太原詔營晉陽宮九月己未次濟源幸御史大夫張衡宅宴飲極歡己巳至于東都壬申以齊王暕爲河南尹開府儀同三司癸酉以戶部尚書楊文思爲納言

四年春正月乙巳詔發河北諸郡男女百餘萬開永濟渠引沁水南達於河北通涿郡庚戌百寮大射于允武殿丁卯賜城內居民米各十石壬申以太府卿元壽爲內史令鴻臚卿楊玄感爲禮部尚書癸酉以工部尚書衛玄爲右武侯大將軍大理卿長孫熾爲戶部尚書二月己卯遣司朝謁者崔毅使突厥處羅致汗血馬三月辛酉以將作大匠宇文愷爲工部尚書壬戌百濟倭赤土迦羅舍國竝遣使貢方物乙丑車駕幸五原因出塞巡長城景寅遣屯田主事常駿使赤土致羅夏四月景午以離石之汾源臨泉鴈門之秀容爲樓煩郡起汾陽宮癸丑以河內太守張定和爲左屯衛大將軍乙卯詔曰突厥意利珍豆啓民可汗率領部落係附關塞遵奉朝禮思改戎俗頻入謁覲屢有陳請以氈牆毳幕事窮荒陋上棟下宇願同比屋誠心懇切朕之所重宜於萬壽成置城造

屋其帷帳牀褥以上隨事量給務從優厚稱朕意焉五月壬申蜀郡獲三足烏張掖獲玄狐各一秋七月辛巳發丁男二十餘萬築長城自榆林谷而東乙未左翊衛大將軍宇文述破吐谷渾於曼頭赤水八月辛酉親祠恒岳河北道郡守畢集大赦天下車駕所經郡縣免一年租調九月辛未徵天下鷹師悉集東京至者萬餘人戊寅彗星出五車掃文昌至房而滅辛巳詔免長城役者一年租賦冬十月景午詔曰先師尼父聖德在躬誕發天縱之姿憲章文武之道命世膺期蘊茲素王而頽山之歎忽踰于千祀盛德之美不在於百代永惟懿範宜有優崇可立孔子後爲紹聖侯有司求其苗裔錄以申上辛亥詔曰昔周王下車首封唐虞之胤漢帝承曆亦命殷周之後皆所以褒立先代憲章在昔朕嗣膺景業傍求雅訓有一弘益欽若令典以爲周兼夏殷文質大備漢有天下

車書混一魏晉沿襲風流未遠竝宜立後以存繼絕之義有司可求其胄緒列聞乙卯頒新式於天下

五年春正月景子改東京爲東都癸未詔天下均田戊子上自東都還京師己丑制民間鐵叉搭鈎積刃之類皆禁絕之太守每歲密上屬官景迹二月戊戌次于闕鄉詔祭古帝王陵及開皇功臣墓庚子制漢魏周官不得爲蔭辛丑赤土國遣使貢方物戊申車駕至京師景辰宴耆舊四百人於武德殿頒賜各有差己未上御崇德殿之西院愀然不悅顧謂左右曰此先帝所居寔用增感情所未安於此院之西別營一殿壬戌制父母聽隨子之官三月己巳車駕西巡河右庚午有司言武功男子史永遵與從父昆弟同居上嘉之賜物一百段米二百石表其門閭乙亥幸扶風舊宅夏四月己亥大獵于隴西壬寅高麗吐谷渾伊吾竝遣使來朝乙巳

次狄道党項羌來貢方物癸亥出臨津關度黃河至西平陳兵講武五月乙亥上大獵於延山長圍周亘二千里庚辰入長寧谷壬午度星嶺甲申宴群臣于金山之上景戌梁浩疊御馬度而橋壞斬朝散大夫黃亘及督役者九人吐谷渾王率衆保覆袁川帝分命內史元壽南屯金山兵部尚書段文振北屯雪山太僕卿楊義臣東屯琵琶峽將軍張壽西屯泥嶺四面圍之吐谷渾王伏允以數十騎遁出遣其名王詐稱伏允保車我真山壬辰詔右屯衛大將軍張定和往捕之定和挺身挑戰爲賊所殺亞將柳武建擊破之斬首數百級甲午其仙頭王窮威率男女十餘萬口來降六月丁酉遣左光祿大夫梁默右翊衛將軍李瓊等追吐谷渾王皆遇賊死之癸卯經大斗拔谷山路隘險魚貫而出風霰晦暝與後宮相失士卒凍死者大半景午次張掖辛亥詔諸郡學業該通才藝

優洽膂力驍壯超絕等倫在官勤奮堪理政事立性正直不避強禦四科舉人壬子高昌王麴伯雅來朝伊吾吐屯設等獻西域數千里之地上大悅癸丑置西海河源鄯善且末等四郡景辰上御觀風行殿盛陳文物奏九部樂設魚龍曼延宴高昌王吐屯設于殿上以寵異之其蠻夷陪列者三十餘國戊午大赦天下開皇己來流配悉放還鄉晉陽逆黨不在此例隴右諸郡給復三年秋七月丁卯置馬牧于青海渚中以求龍種無効而止九月癸未車駕入長安冬十月癸亥詔曰優德尚齒載之典訓尊事乞言義彰膠序鬻熊爲師無取筋力方叔元老克壯其猷朕永言稽古用求至理是以龐眉黃髮更令收斂務簡秩優無虧藥餌庶等臥理佇其弘益今歲耆老赴集者可於近郡處置年七十已上疾患沈滯不堪居職卽給賜帛送還本郡其官至七品以上者量給廩以終厥

身十一月景子車駕幸東都

六年春正月癸亥朔旦有盜數十人皆素冠練衣焚香持華自稱彌勒佛入自建國門監門者皆稽首旣而奪衛士仗將爲亂齊王暕遇而斬之於是都下大索與相連坐者千餘家丁丑角觝大戲於端門街天下奇伎異藝畢集終月而罷帝數微服往觀之己丑倭國遣使貢方物二月乙巳武賁郎將陳稜朝請大夫張鎮州擊流求破之獻俘萬七千口頒賜百官乙卯詔曰夫帝圖草創王業艱難咸依股肱叶同心德用能救厥頽運克膺大寶然後疇庸茂賞開國承家誓以山河傳之不朽近代凋喪四海未壹茅土妄假名實相乖歷茲永久莫能懲革皇運之初百度伊始猶循舊貫未暇改作今天下交泰文軌攸同宜率遵先典永壘大訓自今已後唯有功勳乃得賜封仍令子孫承襲景辰改封安德王雄爲觀王

河間王子慶爲郇王庚申徵魏齊周陳樂人悉配太常三月癸亥
幸江都宮甲子以鴻臚卿史祥爲左驍衛大將軍夏日月丁未宴
江淮已南父老頒賜各有差六月辛卯室韋赤土竝遣使貢方物
壬辰鴈門賊帥尉文通聚衆三千保于莫壁谷遣鷹揚楊伯泉擊
破之甲寅制江都太守秩同京尹冬十月壬申刑部尚書梁毗卒
壬子戶部尚書銀青光祿大夫長孫熾卒十二月己未左光祿大
夫吏部尚書牛弘卒辛酉朱崖人王万昌舉兵作亂遣隴西太守
韓洪討平之

七年春正月壬寅左武衛大將軍光祿大夫真定侯郭衍卒二月
己未上升釣臺臨楊子津大宴百寮頒賜各有差庚申百濟遣使
朝貢乙亥上自江都御龍舟入通濟渠遂幸于涿郡壬午詔曰武
有七德先之以安民政有六本興之以教義高麗虧失藩禮將欲

問罪遼左恢宣勝略雖懷伐國仍事省方今往涿郡巡撫民俗其
河北諸郡及山西山東年九十已上版授太守八十者授縣令三
月丁亥右光祿大夫左屯衛大將軍姚辯卒夏四月庚午幸涿郡
之臨朔宮五月戊子以武威太守樊子蓋爲民部尚書秋大水山
東河南漂沒三十餘郡民相賣爲奴婢冬十月乙卯底柱山崩偃
木逆流數十里戊午以東平太守吐万緒爲左屯衛大將軍十二
月己酉突厥處羅多利可汗來朝帝大悅接以殊禮于時遼東戰
士及餽運者填咽於道晝夜不絕苦役者始爲群盜甲子敕都尉
鷹揚與郡縣相知追捕隨獲斬決之

八年春正月辛巳大軍集于涿郡以兵部尚書段文振爲左候衛
大將軍壬午下詔曰天地大德降繁霜於秋令聖哲至仁著兵甲
於刑典故知造化之有肅殺義在無私帝王之用于戈蓋非獲已

版泉丹浦莫匪龔行取亂覆昏咸由順動況乎甘野誓師夏啓承
大禹之業商郊問罪周發成文王之志永監載籍屬當朕躬粵我
有隋誕膺靈命兼三才而建極一六合而爲家提封所漸細柳蟠
桃之外聲教爰暨紫舌黃枝之域遠至邇安罔弗和會功成理定
於是乎在而高麗小醜迷昏不恭崇聚勃碣之間荐食遼獫之境
雖復漢魏誅夷巢窟暫擾亂離多阻種落還集萃川藪於前代播
寔繁以迄今睠茲華壤翦爲夷類歷年永久惡稔旣盈天道禍淫
亡徵已兆亂常敗德非可勝圖掩愆懷姦唯日不足移告之嚴未
嘗面受朝覲之禮莫肯躬親誘納亡叛不知紀極充斥邊陲亟勞
烽候關柵以之不靜三人爲之廢業在昔薄伐已漏天網旣緩前
禽之戮未卽後服之誅曾不懷恩翻其長惡乃兼契丹之黨虔劉
海戍習鞞韎之服侵軼遼西又青丘之表咸修職貢碧海之濱同

稟正朔遂復寇攘琛賫遏絕往來虐及弗辜誠而遇禍軺軒奉使
爰暨海東旌節所次途經藩境而擁塞道路拒絕王人無事君之
心豈爲臣之禮此而可忍孰不可容且法令苛酷賦斂煩重疆民
豪族咸執國均朋黨比周以之成俗賄貨如市冤枉莫申重以仍
歲災凶比屋饑饉兵戈不息徭役無期力竭轉輸身填溝壑百姓
愁苦爰誰適從境內哀惶不勝其弊回面內向各懷性命之圖黃
髮稚齒咸興酷毒之歎省俗觀風爰屆幽朔弔人問罪無俟再駕
親總六師用申九伐拯厥卮危協從天意殄茲連穢克嗣先謨今
宜授律啓行分麾屆路掩勃澥而雷震及扶餘以電掃比戈按甲
俟誓而後行先令五申必勝而後戰左第一軍可鑊方道第二軍
可長岑道第三軍可海冥道第四軍可蓋馬道第五軍可建安道
第六軍可南蘇道第七軍可遼東道第八軍可玄菟道第九軍可

扶餘道第十軍可朝鮮道第十一軍可沃沮道第十二軍可樂浪道右第一軍可黏蟬道第二軍可含資道第三軍可渾彌道第四軍可臨屯道第五軍可候城道第六軍可提奚道第七軍可踏頓道第八軍可肅慎道第九軍可碣石道第十軍可東脆道第十一軍可帶方道第十二軍可襄平道凡此衆軍先奉廟略駱驛引途總集平壤莫非如豺如貔之勇百戰百勝之雄顧眄則山岳傾頽叱咤則風雲騰鬱腹心攸同爪牙斯在朕躬馭元戎爲其節度涉遼而東循海之右解倒懸於遐裔問疾苦於遺黎其外輕齎游闕隨機赴響卷甲銜枚出其不意又滄海道軍舟艦千里高颿電逝巨艦雲飛橫斷沮江逕造平壤島嶼之望斯絕坎井之路已窮其餘被髮左衽之人控弦待發微盧彭濮之旅不謀同辭仗順臨逆人百其勇以此衆戰勢等摧枯然則王者之師義存止殺聖人之

教必也勝殘天罰有罪本在元惡人之多辟脅從罔理若高元泥首轅門自歸司寇卽解縛焚襯弘之以恩其餘臣人願歸朝奉化咸加慰撫各安生業隨才任用無隔夷夏營壘所次務在整肅芻蕘有禁秋毫勿犯以布恩宥以喻禍福若其同惡相濟抗拒官軍國有常刑俾無遺類明加曉示稱朕意焉總一百一十三萬三千六百號二百萬其餽運者倍之癸未第一軍發終四十日引師乃盡旌旗亘千里近古出師之盛未之有也乙未以右候衛大將軍衛玄爲刑部尚書甲辰內史令元壽卒二月甲寅詔曰朕觀風燕裔問罪遼濱文武叶力爪牙思奮莫不執銳勤王捨家從役罕蓄倉廩之資兼捐播殖之務朕所以夕惕愀然慮其匱乏雖復素飽之衆情在忘私悅使之徒宜從其厚諸行從一品以下飲飛募人以上家口郡縣宜數存問若有糧食乏少皆賑給之或雖有田疇

貧弱不能自耕種可於多丁富室勸課相助使夫居者有斂積之
豐行役無顧後之慮壬戌司空京兆尹光祿大夫觀王雄薨三月
辛卯兵部尚書左候衛大將軍段文振卒癸巳上御師甲子臨戎
于遼水橋戊戌大軍爲賊所拒不果濟右屯衛大將軍左光祿大
夫麥鐵杖武賁郎將錢士雄孟金叉等皆死之甲午車駕度遼大
戰于東岨擊賊破之進圍遼東乙未大頓見二大鳥高丈餘曠身
朱足游泳自若上異之命工圖寫并立銘頌夏五月戊午納言楊
達卒于時諸將各奉旨不敢越機旣而高麗各固城守攻之不下
六月己未幸遼東責怒諸將止城西數里御六合城秋七月壬午
宇文述等敗績于薩水右屯衛將軍薛世雄死之九軍竝陷師奔
還亡者千餘騎癸卯班師九月庚辰上至東都已丑詔軍國異容
文武殊用匡危拯難則霸德攸興化人成俗則王道斯貴時當撥

亂屠販可以登朝世屬隆平經術然後升仕豐都爰肇儒服無預
於周行建武之朝功臣不參于吏職自三方未一四海交爭不遑
文教唯尚武功設官分職罕以才授班朝理人乃由勳敘莫非拔
足行陣出自勇夫學教之道旣所不習政事之方故亦無取是非
暗于在已威福專于下吏貪冒貨賄不知紀極蠹政害民寔由於
此自今已後諸授勳官者竝不得回授文武職事庶遵彼更張取
類於調瑟求諸名製不傷於美錦若吏部輒擬用者御史卽宜糾
彈冬十月戊寅工部尚書宇文愷卒十一月己卯以宗女華容公
主嫁于高昌王辛巳光祿大夫韓壽卒甲申敗將宇文述于仲文
等除名爲民斬尚書右丞劉士龍以謝天下是歲大旱疫人多死
山東尤甚密詔江淮南諸郡閱視民間童女姿質端麗者每歲貢
之

九年春正月丁丑徵天下兵募民爲驍果集于涿郡壬午賊帥杜
彥永王潤等陷平原郡大掠而去辛卯置折衝果毅武勇雄武等
郎將官以領驍果乙未平原李德逸聚衆數萬稱阿舅賊劫掠山
東靈武白榆妄稱奴賊劫掠牧馬北連突厥隴右多被其患遣將
軍范貴討之連年不能克戊戌大赦己亥遣代王侑刑部尚書衛
玄鎮京師辛丑以右驍衛將軍李渾爲右驍衛大將軍二月己未
濟北人韓進洛聚衆數萬爲群盜壬午復宇文述等官爵又徵兵
討高麗三月景子濟北人孟海公起兵爲盜衆至數萬丁丑發丁
男十萬城太興戊寅幸遼東以越王侗爲工部尚書樊子蓋鎮東
都庚子北海人郭方預聚徒爲賊自號盧公衆至三萬攻陷郡城
大掠而去夏四月庚午車駕度遼壬申遣宇文述楊義臣趣平壤
城五月丁丑熒惑入南斗己卯濟北人甄寶車聚衆萬餘寇掠城

邑六月乙巳禮部尚書楊玄感反於黎陽丙辰玄感逼東都河南
贊理裴弘策拒之反爲賊所敗戊辰兵部侍郎斛斯政奔于高麗
庚午上班師高麗犯後軍敕右武衛大將軍李景爲後拒遣左翊
衛大將軍宇文述左候衛將軍屈突通等馳傳發兵以討玄感秋
七月己卯令所在發人城縣府驛癸未餘杭人劉元進舉兵反衆
至數萬八月壬寅左翊衛大將軍宇文述等破楊玄感于闕鄉斬
之餘黨悉平癸卯吳人朱爕晉陵人管崇擁衆十萬餘自稱將軍
寇江左甲辰制驍果之家蠲免賦役丁未詔郡縣城去道過五里
已上者徙就之戊申制盜賊籍沒其家乙卯賊帥陳瑱等三萬攻
陷信安郡辛酉司農卿光祿大夫葛國公趙元淑以罪伏誅九月
己卯濟陰人吳海流東海人彭季才竝舉兵爲盜衆數萬庚辰賊
帥梁慧尚聚衆四萬陷蒼梧郡甲午車駕次上谷以供費不給上

大怒免太守虞荷等官丁酉東陽人李三兒向但子舉兵作亂衆至萬餘閏月己巳幸博陵庚午上謂侍臣曰朕昔從先朝周旋於此年甫八歲日月不居倏經三紀追惟曩昔不可復希言未卒流涕嗚咽侍衛者皆泣下沾襟冬十月丁丑賊帥呂明星率衆數千圍東郡武賁郎將費青奴擊斬之乙酉詔曰博陵昔爲定州地居衝要先王歷試所基王化斯遠故以道冠幽風義高姚邑朕巡撫氓庶爰屆茲邦瞻望郊墟緬懷敬止思所以宣播慶澤覃被下人崇紀顯號式光令緒可改博陵爲高陽郡赦境內死罪以下給復一年于是召高祖時故吏皆量才授職壬辰以納言蘇威爲開府儀同三司朱爕管崇推劉元進爲天子遣將軍吐萬緒魚俱羅討之連年不能尅齊人孟讓王薄等衆十餘萬據長白山攻剽諸郡清河賊張金稱衆各數萬勃海賊帥格謙自號燕王孫宜雅自號

齊王衆各十萬山東苦之丁亥以右候衛將軍郭榮爲右候衛大將軍十一月己酉右候衛將軍馮季慈討張金稱於清河及爲所敗季慈死之十二月甲辰車裂楊玄感弟朝散大夫積善及黨與十餘人仍焚而揚之丁亥扶風人向海明舉兵作亂稱皇帝建元白鳥遣太僕卿楊義臣擊破之

十年春正月甲寅以宗女爲信義公主嫁于突厥曷娑那可汗二月辛未詔百寮議伐高麗數日無敢言者戊子詔曰竭力王役致身戎事咸由徇義莫非勤誠委命草芥暴骸原野興言念之每懷愍惻往年問罪將屆遼濱廟算勝略具有進止而諒愔凶罔識成敗高顯復恨本無智謀臨三軍猶兒戲視人命如艸芥不遵成規坐貽撓退遂令死亡者衆不及埋藏今宜遣使人分道收葬設祭於遼西郡立道場一所恩加泉壤庶弭窮魂之冤澤及枯骨用弘

仁者之惠辛卯詔曰黃帝五十二戰成湯二十七征方乃德施諸
侯令行天下盧芳小盜漢祖尚且親戎隗囂餘燼光武猶自登隴
豈不欲除暴止戈勞而後逸者哉朕纂承寶業君臨天下日月所
照風雨所霑孰非我臣獨隔聲教蕞爾高麗僻居荒裔鴟張狼噬
侮慢不恭抄竊我邊壘侵逼我城鎮是以去歲出軍問罪遼碣殪
長蛇于玄菟戮封豕于襄平扶餘衆軍風馳電逝追奔逐北徑踰
泃水滄海舟楫衝賊腹心焚其城郭汙其宮室高元伏鎖泥首送
款軍門尋請入朝歸罪司寇朕以許其改過乃詔班師而長惡靡
悛宴安鴟毒此而可忍孰不可容便可分命六師百道俱進朕當
親執武節臨御諸軍秣馬九都觀兵遼水順天誅於海外拯窮民
於倒懸征伐以正之明德以誅之止除元惡餘無所問若有識存
亡之分悟安危之機翻然北首自求多福必其同惡相濟抗拒王

師若火燎原刑茲無赦有司便宜宣布咸使知聞丁酉扶風人唐
弼舉兵反衆十萬推李弘爲天子自稱唐王三月壬子行幸涿郡
癸亥次臨渝宮親御戎服禡祭黃帝斬叛軍者以釁鼓夏四月辛
未彭城賊張大彪聚衆數萬保縣薄山爲盜遣榆林太守董純擊
破斬之甲午車駕次北平五月庚子詔舉郡孝悌廉潔各十人壬
寅賊帥宋世謨陷琅邪庚申延安人劉迦論舉兵反自稱皇王建
元大世六月辛未賊帥鄭文雅林寶護等衆三萬陷建安郡太守
楊景祥死之秋七月癸丑車駕次懷遠鎮乙卯曹國遣使貢方物
甲子高麗遣使請降囚送斛斯政上大悅八月己巳班師右衛大
將軍左光祿大夫鄭榮卒冬十月丁卯上至東都已丑還京師十
一月景申支解斛斯政于金光門外乙巳有事于南郊己酉賊帥
司馬長安破長平郡乙卯離石胡劉苗王舉兵反自稱天子以其

第六兒爲永安王衆至數萬將軍潘長文討之不能尅是月賊帥王德仁擁衆數萬係林慮山爲盜十二月壬申上如東都其日大赦天下戊子入東都庚寅賊帥孟讓衆十餘萬據都梁宮遣江都丞王世充擊破之盡虜其衆

十一年春正月甲午朔宴百寮突厥新羅靺鞨畢大辭訶咄傳越烏那曷波臘吐火羅俱慮建忽論靺鞨訶多沛汗龜茲疏勒于闐安國曹國何國穆國畢衣密失範延伽折契丹等國竝遣使朝貢戊戌武賁郎將高建毗破賊帥顏宣政于齊郡虜男女數千口乙卯大會蠻夷設魚龍曼延之樂頒賜各有差二月戊辰賊帥楊仲緒等率衆萬餘攻北平滑公李景破斬之庚午詔曰設險守國著自前經重門禦暴事彰往策所以宅土寧邦禁邪固本而近代戰爭居人散逸田疇無伍郭郭不修遂使遊惰寔繁寇攘未息今天

下平一海內晏如宜令人悉城居田隨近給使強弱相容力役兼濟穿窬無所厝其姦宄藿蒲不得聚其逋逃有司具爲事條務令得所景子王須拔反自稱漫天王國號燕賊帥魏刁兒自稱歷山飛衆各十餘萬北連突厥南寇趙三月丁酉殺右驍衛大將軍光祿大夫郝公李渾將作監光祿大夫李敏竝族滅其家癸卯賊帥司馬長安破西河已酉幸太原避暑汾陽宮秋七月己亥淮南人張起緒舉兵爲盜衆至三萬辛丑光祿大夫右禦衛大將軍張壽卒八月乙卯巡北塞戊辰突厥始畢可汗率騎數十萬謀襲乘輿義成公主遣使告變壬申車駕馳幸鴈門癸酉突厥圍城官軍頻戰不利上大懼欲率精騎潰圍而出民部尚書樊子蓋固諫乃止齊王暕以後軍係于崞縣甲申詔天下諸郡募兵於是守令各來赴難九月甲辰突厥解圍而去丁未曲赦太原鴈門死罪已下冬

十月壬戌上至於東都丁卯彭城人魏騏驎聚眾萬餘爲盜寇魯郡壬申賊帥盧明月聚眾十餘萬寇陳汝間東海賊李子通擁眾度淮自號楚王建元明政寇江都十一月乙卯賊帥王須拔破高陽郡十二月戊寅有大流星如斛隆明月營破其衝車庚辰詔民部尚書樊子蓋發關中兵討絳郡賊敬盤陔柴保昌等經年不能尅譙郡人朱粲擁眾數十萬寇荆襄僭稱楚帝建元昌達漢南諸郡多爲所陷焉

十二年春正月甲午鴈門人翟松柏起兵於靈丘眾至數萬轉攻傍縣二月己未真臘遣使貢方物甲子夜有二大鳥似鵬飛入大業殿止于御幄至明而去癸亥東海賊盧公暹率眾萬餘保于蒼山夏四月丁巳顯陽門災癸亥魏刁兒所部將甄翟兒號歷山飛眾十萬轉寇太原將軍潘長文討之反爲所敗長文死之五月景

戊朔日有蝕之旣癸巳大流星殞於吳郡爲石壬午上於景華宮徵求螢火得數斛夜出遊山而放之光遍巖谷秋七月壬戌民部尚書光祿大夫濟北公樊子蓋卒甲子幸江都宮以越王侗光祿大夫段達太府卿元文都檢校民部尚書韋津右武衛將軍皇甫無逸右司郎盧楚等總留守事奉信郎崔民象以盜賊充斥于建國門表諫不宜巡幸上大怒先解其頤乃斬之戊辰馮翊人孫華自號總管舉兵爲盜高涼通守洗瑤徹舉兵作亂嶺南溪洞多應之己巳熒惑守羽林月餘乃退車駕次汜水奉信郎王愛仁以盜賊日盛諫上請還西京上怒斬之而行八月乙巳賊帥趙万海眾數十萬自恒山寇高陽壬子有大流星如斗出王良閣道聲如壞牆癸丑大流星如甕出羽林九月丁酉東海人杜伏威揚州沈覓敵等作亂眾至數萬右禦衛將軍陳稜擊破之戊午有二枉矢出

北斗魁委曲地形注于南斗壬戌安定人荔非世雄殺臨涇令舉兵作亂自號將軍冬十月己丑開府儀同三司左翊衛大將軍光祿大夫許公宇文述薨十二月癸未鄱陽賊操天成舉兵反自號元興王建元始興攻陷豫章郡乙酉以右翊衛大將軍來護爲開府儀同三司行左翊衛大將軍壬辰鄱陽人林士弘自稱皇帝國號楚建元太平攻陷九江廬陵郡唐公破甄翟兒於西河虜男女千口

十三年春正月壬子齊郡賊杜伏威率衆度淮攻陷歷陽郡景辰勃海賊竇建德設壇於河間之樂壽自稱長樂王建元丁丑辛巳賊帥徐圓朗率衆數千破東平郡弘化人到合聚衆萬餘人爲盜傍郡苦之二月壬午朔方人梁師都殺郡丞唐世宗據郡反自稱大丞相遣銀青光祿大夫張世隆擊之反爲所敗戊子賊率王

子英破上谷郡己丑馬邑校尉劉武周殺太守王仁恭舉兵作亂北連突厥自稱定楊可汗庚寅賊帥李密翟讓等陷興洛倉越王侗遣武賁郎將劉長恭光祿少卿房胤擊之反爲所敗死者十五六庚子李密自號魏公稱元年開倉以賑郡盜衆至數十萬河南諸郡相繼皆陷焉壬寅劉武周破武賁郎將王智辯于桑乾鎮智辯死之三月戊午廬江人張子路舉兵反遣右禦衛將軍陳稜討平之丁丑賊帥李通德衆十萬寇廬江左屯衛將軍張鎮擊破之夏四月癸未金城校尉薛舉率衆反自稱西秦霸王建元秦興攻陷隴右諸郡己丑賊帥孟讓夜入東都外郭燒豐都市而去癸巳李密陷迴洛東倉丁酉賊帥房憲伯陷汝陰郡是月光祿大夫武賁郎將裴仁基淮陽太守趙佗等竝以衆叛歸李密五月辛卯夜有流星如甕墜於江都甲子唐公起義師于太原景寅突厥數千

寇太原唐公擊破之秋七月壬子熒惑守積屍景辰武威人李軌
舉兵反攻陷河曲諸郡自稱涼王建元安樂八月辛巳唐公破武
牙郎將宋老生于霍邑斬之九月巳丑帝括江都人女寡婦以配
從兵是月武陽郡丞元寶藏以郡叛歸李密與賊帥李文相攻陷
黎陽倉彗星見於營室冬十月丁亥太原陽世洛聚眾萬餘人寇
掠城邑景申羅令蕭銑以縣反鄱陽人董景珍以郡反迎銑於羅
縣號爲梁王攻陷傍郡戊戌武賁郎將高毗敗濟北郡賊甄寶車
於嶮山十一月景辰唐公入京師辛酉遙尊帝爲太上皇立代王
侑爲帝改元義寧上起宮丹楊將遜于江左有烏鵲來巢幄帳驅
不能止熒惑犯太微有石自江浮入于楊子日光四散如流血上
甚惡之二年三月右屯衛將軍宇文化及武賁郎將司馬德戡元
禮監門直閣裴虔通將作少監宇文智及武勇郎將趙行樞鷹揚

郎將孟景內史舍人元敏符璽郎李覆牛方裕千牛左右李孝本
弟孝質直長許弘仁薛世良城門郎唐奉義醫正張愷等以驍果
作亂入犯宮闈上崩于溫室時年五十蕭后令宮人撤牀簀爲棺
以埋之化及發後右禦衛將軍陳稜奉梓宮於成象殿葬吳公臺
下發斂之始容貌若生衆咸異之大唐平江南之後改葬雷塘初
上自以蕃王次不當立每矯情飾行以釣虛名陰有奪宗之計時
高祖雅重文獻皇后而性忌妾媵皇太子勇內多嬖幸以此失愛
帝後庭有子皆不育之示無私寵取媚於后大臣用事者傾心與
交中使至第無貴賤皆曲承顏色申以厚禮婢僕往來者無不稱
其仁孝又常私入宮掖密謀於文獻后楊素等因機構扇遂成廢
立自高祖大漸暨諒闇之中蒸淫無度山陵始就卽事巡游以天
下承平日久士馬全盛慨然慕秦皇漢武之事乃盛理宮室窮極

侈靡召募行人分使絕域諸蕃至者厚加禮賜有不恭命以兵擊之盛興屯田於玉門柳城之外課天下富室分道市武馬疋直十餘萬富強坐是而凍餒者十家而九性多詭譎所幸之處不欲人知每幸之所輒數道置頓四海珍羞殊味水陸必備焉求市者無遠不至郡縣官人競爲獻食豐厚者進擢疎儉者獲罪姦吏侵漁內外虛竭頭會箕斂人不聊生于時軍國多務日不暇給帝方驕怠惡聞政事冤屈不理奏請罕決又猜忌臣下無所專任朝臣有不合意者必構其罪而族滅之高頴賀若弼先皇心膺參謀帷幄張衡李金才藩邸惟舊績著經綸惡其直道忌其正議求其無形之罪加以丹頸之戮其餘事君盡禮蹇蹇匪躬無辜無罪橫受夷戮者不可勝紀政刑弛紊賄貨公行莫敢有言道路以目六軍不息百役繁興行者不歸居者失業人饑相食邑落爲墟上弗之恤

也東西行幸靡有定居每以供費不給逆收數年之賦所至唯與後宮流連耽湎惟日不足招迎姥媪朝夕共肆醜言又引少年令與宮人穢亂不軌不遜以爲娛樂區宇之內盜賊蜂起劫掠從官屠陷城邑近臣互相掩蔽皆隱賊數不以實對或有言賊多者輒大被詰責各求苟免上下相蒙每出師徒敗亡相繼戰士盡力不加賞賜百姓無辜咸受屠戮蒸庶積怨天下土崩至於就禽而尸未之寤也

恭皇帝諱侑元德太子之子也母曰韋妃性聰敏有氣度大業三年立爲陳王後數載徙爲代王及煬帝親征遼東令於京師總留事十一年從幸晉陽拜太原太守尋鎮京師義兵入長安尊煬帝爲太上皇奉帝纂業義寧元年十一月壬戌上卽皇帝位于大興殿詔曰王道喪亂天步不康屬之於朕逢此百罹襁褓之歲夙遭

憫凶孺子之辰太上播越興言感動實疚于懷太尉唐公膺期作宰糾合義兵翼戴皇室爰奉明詔弼予幼沖顯命光臨天威咫尺對揚尊號悼心失圖一人在遠三讓不遂僂俛南面厝身無所苟利社稷莫敢或違俯從群議奉遵聖旨可大赦天下改大業十三年爲義寧元年十一月十六日昧爽以前大辟罪已下皆赦除之常赦所不免者不在赦限甲子以光祿大夫大將軍太尉唐公爲假黃鉞使持節大都督內外諸軍事尚書令大丞相進封唐王景寅詔曰朕惟孺子未出深宮大上遠巡追蹤穆滿時逢多難委當尊極辭不獲免恭已臨朝若涉大川罔知所濟民之情僞曾未之聞賴股肱勳力上宰賢良匡佐沖人輔其不逮軍國機務事無大小文武設官位無貴賤憲章賞罰咸歸相府庶績其凝責成斯屬已巳以唐王子隴西公建成爲唐國世子敦煌公爲京兆尹改封

秦公元吉爲齊公太原置鎮北府乙亥張掖康老和舉兵及十二月癸未薛舉自稱天子寇扶風秦公爲元帥擊破之丁亥桂陽人曹武徹舉兵反建元通聖丁酉義師禽驍衛大將軍屈突通於闕鄉乙巳賊帥張善安陷廬江郡

二年春正月丁未詔唐王劔履上殿入朝不趨贊拜不名加前後羽葆鼓吹壬戌將軍王世充爲李密所敗河內通守孟善誼武賁郎將王辨楊威劉長恭梁德董智通皆死之庚戌河陽郡尉獨孤武都降于李密三月景辰右屯衛將軍宇文化及弒太上皇於江都宮右禦衛將軍獨孤盛死之齊王暕趙王杲燕王倓右翊衛大將軍宇文協內史侍郎虞世基御史大夫裴蘊給事郎許善心皆遇害化及立秦王浩爲帝自稱大丞相朝士文武皆受其官爵光祿大夫宿公麥木折衝郎將朝請大夫沈同謀討賊夜襲化及營

反爲所害戊辰詔唐王備九錫之禮加璽紱遠游冠綠綬綬位在諸侯王上唐國置丞相已下一依舊式五月乙巳朔詔唐王冕十有二旒建天子旌旗出警入蹕金根車駕備五時副車置旄頭雲罕車儻八佾設鍾虞宮縣王后王子王女爵命之號一遵舊典戊午詔曰天禍隋國大行太上皇遇盜江都憫予小子哀號永感仰惟荼毒仇復靡申相國唐王膺期命世扶危拯溺自北徂南東征西怨總九合於一匡決百勝于千里糾率夷夏大庇氓黎保乂朕躬繫王是賴德侔造化功格蒼旻兆庶歸心曆數斯在屈爲人臣載違天命當今九服崩離三靈改卜大運去矣請避賢路私僮命駕須歸藩國予本代王及予而代天之所廢豈期如是庶憑稽顙之聖以誅四凶幸值惟新之恩預充三恪雪冤恥于皇祖守禮爲孝孫朝聞夕殞及永無恨今遵故事遜於舊邸庶言

唐朝宜依前典趣上尊號若釋重負感泰兼懷假手真人俾除醜逆仍敕有司凡有表奏皆不得以聞是日上遜位於大唐以爲鄴國公武德二年夏五月崩時年十五

史臣曰煬帝爰在弱齡早有志尚南平吳會北却匈奴昆弟之中獨著聲績於是矯情飾貌肆厥姦回故得獻后鍾心文皇革慮天方肇亂遂升儲兩踐峻極之榮基承丕顯之休命地廣三代威振八紘單于頓顙越常重譯赤仄之泉流溢于都內紅腐之粟充積于塞下負其富強之資思逞無厭之欲狹殷周之制度尚秦漢之規模恃才矜已傲佞明德內懷險躁外示凝簡盛冠服以塞其姦除諫官以掩其過淫荒無度法令茲彰教絕四維刑參五虐誅鋤骨肉屠劓忠良受賞者莫見其功爲戮者莫聞其罪驕怒之兵屢動土木之功不息頻出朔方三駕遼左旌旗萬里徵稅百端猾吏

侵漁人弗堪命乃急令暴賦以擾之嚴刑峻法以臨之甲兵威武以董之自是海內騷然無聊生矣俄而玄感肇黎陽之亂匈奴有鴈門之圍天子方棄中土遠之楊越姦宄乘釁強弱相陵關梁閉而不通皇輿往而莫返加以師旅因之以饑饉流離道路轉死溝壑十七八焉於是相聚藿蒲蝟毛而起大則跨州連郡稱帝稱王小則千百爲群攻城剽邑流血成川澤死人如亂麻炊者不及析骸食者不遑易子茫茫九土竝爲麋鹿之場悻悻黔黎俱充蛇豕之餌四方萬里簡書相續猶謂鼠竊狗盜不足爲虞上下相蒙莫肯念亂振蜉蝣之羽窮長夜之樂土崩魚爛貫盈惡稔普天之下莫匪仇讎左右之人皆爲敵國終然不悟同彼望夷遂以萬乘之尊死于匹夫之手億兆靡感恩之士九牧無勤王之師子弟同就誅夷體骨棄而莫掩社稷顛隕本枝殄絕自肇有書契以迄于茲宇宙崩離生靈塗炭喪身滅國未有若斯之甚也書曰天作孽猶可違自作孽不可逭傳曰吉凶由人祇不妄作又曰兵猶火也不戢將自焚觀隋室之存亡斯言有徵矣恭帝年在幼沖遭家多難一人失德四海土崩群盜蜂起豺狼塞路南巢遂往流彘不歸旣鍾百六之期躬踐數終之運謳歌有屬笙鍾變響雖欲不遵堯舜之迹庸可得乎

漢書

卷六

北史卷十二 隋本紀下第十二終

蘇州忠國氏

一

